



K1 tasol

WINIM K1,000 MAMA FLAME MEKIM BILUM KOMPETISEN

Mekim bilum bilong yu yet wantaim Flame Flour mak. Laikim Facebook peis na postim foto bilong yu wantaim bilum yu karim na yu bai gat sans long winim. (Fopela inap long winim. Wanpela long wanwan region)

go to FlameFlourPNG on Facebook



Wok bilong Leit Kamma bai karim kaikai bihain taim

WOK bilong Leit Steven Pirika Kamma, husat i Memba bilong Saut Bogenvil na Minista bilong Helpim Prait Minista long ol Samting bilong Mama Lo, bai karim kaikai long bihain taim, Prait Minista Peter O'Neill i tok.

Prait Minista O'Neill i bin luksave olsem Leit Kamma em i wanpela lida bilong mekim stretpela tok-tok, soim gutpela pasin na lida tru bilong bringim bel isi na gutpela sindaun long Bogenvil.

Mista O'Neill i bin bungim ol famili bilong Leit Kamma na tok sori long ol i lusim papa na lida bilong ol.

Tasol Mista O'Neill i

tok hat wok Leit Kamma i bin mekim bai karim gutpela kaikai bihain taim long laip na sindaun bilong ol manmeri Bogenvil.

Em i mekim dispela toktok long taim bilong haus krai bilong Leit Steven Kama long Nesenel Palamen, Waigani long Tunde dispela wik.

Prait Minista O'Neill, Palamen Spika Theo Zurenuoc, ol senia gavman minista na ol arapela Memba bilong Palamen i bin stap haus krai long Tunde taim bodi bilong Leit Kamma i bin kambek long kantri.

Leit Steven Kamma i lusim laip taim em i bin stap long haus sik long Manila, Filipins

long Febueri 20, 2016 kam long stretim gen bihain long em i bin sik.

Long dispela taim bilong haus krai, Prait Minista O'Neill i tok Leit Kamma i bin mekim planti gutpela samting long bringim bel isi, senisim laip bilong ol manmeri, bringim ol sevis, na kirapim Bogenvil long larim sindaun bilong ol manmeri Bogenvil i stap gut bihain long bikpela hevi i bin kamap long hap.

"Tude mipela i krai na wari long lusim wanpela nesenel lida bilong yumi, wanpela trupela lida bilong dispela kantri na Atenomas Rijon ov Bogenvil.

"Leit Kamma i lida bilong bringim bel isi i

kam long stretim gen gutpela sindaun bilong ol pipel bilong Bogenvil. Em i stretpela man bilong tok tru tasol.

Mipela bai hat long lus tingting long gutpela wok em i bin mekim olsem Memba bilong Saut Bogenvil na Minista bilong Bogenvil Afes.

"Ministri bilong Bogenvil Afeas em i wanpela bikpela ministri we i gat planti wok long mekim na Leit Kamma i bin kamap gutpela Minista long mekim ol wok long gutpela we bilong mekim wok stret," Mista O'Neill i tok.

Moa stori long pes 2



Prait Minista Peter O'Neill i tok sori long Anna Kamma, meri bilong Leit Steven Kamma, long Nesenel Palamen. Leit Steven Kamma em i siting Memba bilong Saut Bogenvil na Minista bilong Helpim Prait Minista long ol Konstitusenal Metas. Em i bin sik na dai las wik long Manila, Filipins we em i bin go long haus sik.



BEHIND THE BLOCKADE

Edita bilong Wantok Niuspepa autim buk Ol piksa na stori i stap insait long pes 14

Buk lonsing...



Unlimited talktime with friends

Dial *777# to subscribe.



76003555 or 1555
connect@bmobile.com.pg

www.bmobile.com.pg/unlimited

GG Ogio salim tok sori bilong em

GAVANA Jeneral Gren Sif, Sir Michael Ogio, i tok sori long dai bilong Leit Memba bilong Saut Bogenvil na pastaim Minista bilong Bogenvil Afeas, Steven Pirika Kamma.

Gren Sif Sir Michael i bin kambek long kantri bihain long em i bin go sekim sik bilong lewa bilong em long haus sik long Singapore na em i bin harim olsem Leit

Kamma i bin sik tu na dai long Manila, Filipins long Febueri 20, 2016.

Gren Sif Sir Michael i tok dai bilong Leit Kamma i mekim ol pipel bilong Saut Bogenvil i lusim wanpela bikpela lida bilong ol, husat i bin makim maus bilong ol long yia 2007 i kam inap nau.

Sir Michael i tok Leit Kamma i bin sanap olsem lida

na tokim ol manmeri bilong Atenomos Rijon ov Bogenvil (ARB) long sanap strong tu na kirapim ples bihain long Bogenvil Kraisis i bin bagarapim pes.

Em i tok Leit Kamma i bin mekim gutpela wok long kamapim gutpela pasin poroman na yuniti namel long long pipel na lida bilong Bogenvil na em i save sapatim ol

manmeri long sanap strong na kamapim gutpela pasin long komyuniti.

"Ledi Esmie na mi i salim tok sori i go long meri bilong Leit Kamma, ol pikinini bilong tupela, ol wanlain na famili memba, ol pipel bilong Saut Bogenvil na long ol pipel bilong ARB long dispela taim no gut we lida bilong yumi i lusim yumi," Sir Michael i tok.



Gavana Jeneral Peter Ogio wantaim Ledi Esmie.

Nerau salim tok sori long Leit Steven Kamma

SIAMAN bilong Kumul Consolidated Holdings (KCH), Paul Nerau, i salim tok sori i go long pipel bilong Saut Bogenvil na famili bilong Leit Steven Pirika Kamma.

Mista Kamma, husat i Memba bilong Saut Bogenvil na Minista bilong Helim Praim Minista long ol Samting bilong Mama Lo, i bin sik na lusim laip long Manila, Filipins long Febueri 20, 2016.

Mista Nerau i tok:

"Yumi lusim wanpela bikpela lida. Long dispela taim bilong haus kraik, mi laik bihainim toktok bilong Praim Minista Peter O'Neill na na salim tok sori i go long ol ol pipel bilong Saut Bogenvil na tu long ol famili bilong Leit Kamma.

"Leit Kamma i bin sevim gut tru stret pipel bilong dispela kantri. Em i bin hat wok tru long bringim bel isi na gutpela sindaun long pipel bilong

Saut Bogenvil na pipel bilong Bogenvil Ailan."

"Mi sori tru long harim olsem em i dai. Dispela em i sori taim bilong yumi long PNG na long Bogenvil wantaim.

"Tasol mi laik tok tenkyu long Papa God i bin givim yumi dispela kain gutpela lida husat i save putim pipel i go pas.

"Vale Steven Kamma Pirika na yu ken malolo gut."

"Mipela i salim tok sori

go long famili, ol wan lain na planti ol poroman bilong em."

Leit Kamma em i memba bilong Yunaited Risos Pati (URP) na em i bin stap Minista bilong Bogenvil Afeas long 2011-12 aninit long O'Neill-Namah Gavman.

Em i bin kisim bek dispela ministri taim em i bin winim bek sia bilong em long Saut Bogenvil long 2012 Nesenel Ilekseen.

Wok bilong Leit Kamma bai karim kaikai bihain taim

I kam long pes 1

"Em i save harim gut toktok bilong ol komyuniti na i save skelim tingting bilong ol manmeri. Em i wanpela trupela lida na ol manmeri i save bilip long em.

"Long ol famili bilong Leit Kamma, mi makim maus bilong dispela kantri na pipel bilong yumi long PNG long salim tok sori i go long yupela.

"Ol pipel bilong PNG i tok tenkyu long gutpela wok na komitmen bilong Leit Kamma long bringim bel isi na gutpela sindaun long Bogenvil.

"Mipela bai no inap lus ting ting long dispela ol utpela wok em i bin mekim.

"Ol pipel bilong Bogenvil i bin bungim hevi na kisim bikpela bagarap inap 30 yia olgeta na gavman bilong yumi i wok long wok hat long bringim bel isi na gutpela sindaun long komyuniti.

"Mi amamas olsem yumi bin sainim agrimen long kirapim bel isi na dispela pis agrimen bai karim kaikai long bihain taim. Dispela ol gutpela wok Leit Kamma i bin mekim bai stap yet na bringim gutpela samting long kirapim Bogenvil na senisim ples long kamap gutpela na larim ol manmeri bilong Bogenvil i stap gut long bihain taim.

"Papa God i blesim Leit Honorable Steven Kamma," Praim Minista O'Neill i tok.

Leit Kamma em i siting Memba bilong Palamen, na Minista bilong Helpim Praim Minista long ol

Konstitusenal Metas, taim em i bin dai long Febueri 20, 2016.

Em i bin wanpela memba bilong Yunaited Risos Pati (URP), we em dispela pati em i wanpela kolisen insait long O'Neill-Dion gavman.

Leit Kamma i bin jonim Nesenel Palamen long yia 2008 long makim ol pipel bilong Saut Bogenvil long Atonomas Rijon ov Bogenvil (AROB).

Em i bin stap Minista bilong Bogenvil Afeas i kam inap yia 2016 taim Praim Minista Peter O'Neill i kisim ples bilong em bikos em i bin sik na go kam long haus sik olvasi.

Long stat bilong dispela yia, sik bilong Leit Kamma i bin kamap bikpela na Mista O'Neill i givim nupela wok ong em olsem Minista bilong Helpim Praim Minista long ol Konstitusenal Metas (o ol Samting Bilong Mama Lo).

Bihainim dai bilong Memba bilong Angoram, Ludwig Schulze, whusta i bin dai long yia 2013, na Mmema bilong Gailala, Daniel Mona, husat i bin dai long yia 2015, Leit Kamma i kamap namba 3 siting memba long dai taim em i mekim wok olsem wanpela lida bilong dispela kantri.

Wanpela delegesen bilong Nesenel Gavman i kisim bodi bilong Leit Kamma i go long Buka asde na i lusim long han bilong Atonomas Bogenvil Gavman na ol wan lain bilong em.

SI Praim Minista kam raun long PNG

PRAIM Minista Peter O'Neill i tok welkam long Praim Minista bilong Solomon Islands, Manasseh Sogavare, long Pot Mosbi long las wik Fonde.

Praim Minista Sogavare i kam raun long Pot Mosbi aninit long wok bilong em olsem Siaman bilong Melanesian Spiahed Grup (MSG).

MSG em i wanpela ogenesesen bilong PNG, Solomon Islands, Fiji, Vanutau, na FLNKS bilong Nu Kaledonia.

Opis o seketeriet bilong MSG i stap long Port Vila, Vanuatu.


Mista O'Neill i tok PNG i wanpela strongpela sapota bilong ol wok MSG Seketeriet i save mekim. Mista O'Neill i tok em i gutpela long MSG Seketeriet i wok long luksave na stretim ol nids bilong manmeri bilong Melanesia.

"Ol wok bilong MSG i mas bihainim ol nid bilong manmeri bilong dispela Melanesian rijon," Mista O'Neill i tok.

"Ol MSG kantri i wok long bungim ol salens long sait long global ikonomi i wok long pundaun i go daun na yumi i was gut na yusim mani long gutpela we bilong yusim.

"MSG i mas lukluk long ol opresen bilong em na em i mas yusim ol mani gut."

Tupela Praim Minista i bin toktok long ol manmeri Fiji i bungim bikpela hevi bihain long strong-



Praim Minista O'Neill sekan wantaim Praim Minista Sogavare.

pela win ol i kolim Saiklon Winston i bin kamapim birua long laip na propeti bilong ol manmeri.

"MSG i salim tok sori i go long ol manmeri bilong Fiji husat i kisim bikpela bagarap bihain long strongpela win i bin bagarapim ples na kilim ol manmeri.

"MSG, na Pasifik Ailan Forum, na ol wan wan kantri long MSG na Pasifik i putim ai long helpim Fiji na ol manmeri long Fiji husat i kisim bagarap long dispela birua.

"Long sait bilong PNG, mipela bai sapatim Fiji long wanem samting ol i nidim. Bai mipela i helpim ol manmeri bilong Fiji long wankain we olsem yumi i bin helpim ol manmeri PNG husat i bin kisim hat taim wantaim bikpela hot san na drot."

Mista O'Neill na Mista Sogavare i toktok long sait bilong ol provins bilong Papua na na West Papua long Indonesia

"Olsem Praim Minista bilong PNG na Siaman bilong Pasifik Ailans Forum (PIF), mi wok long toktok wantaim Gavman bilong Indoensia na Presiden Joko Widodo.

"Bai mipela i strongim ol gutpela toktok namel long tupela kantri. Pasin bilong rispek long wanpela na narapela i mass tap namel long ol dispela toktok.

"Mipela i lukluk long kamapim gutpela pasin bilong save long wanpela na narapela long stretim sindaun, sefti na sekyuriti bilong lilien manmeri husat i ol Melanesian brata na sista bilong yumi i stap long narapela sait bilong boda."

Mista O'Neill i toksave

long Praim Minista Sogavare long kam raun gen long PNG long bung bilong ol lida bilong Afrika, Karibien, na Pasifik (APC) kantri long dispela yia.

"Mi tokim Praim Minista Sogavare long kam raun gen long PNG long pinis bilong mun Meiwe ol lida na delegesen bilong moa long 79 ACP memba kantri bai kam bung.

"Dispela miting bai kamap long Pot Mosbi we ol lida bai toktok long sampela ol bikpela samting kirapim ikonomi na sosel developmen," Mista O'Neill i tok.



Praim Minista Peter O'Neill i soim rispek long ol femili bilong leit Steven Pirika Kamma.

PNG i ken abrusim hevi bilong ikonomi

MASKI ol prais bilong ol komoditi i wok long pundaun, PNG i gat bikpela sans long menesim gut sampela ol global salens we planti ol arapela kantri i hat long menesim.

PNG i nau wok long bungim hevi taim prais bilong ol samting bilong salim na kisim mani olsem gol, kopa, nikel, silva, oil, ges na ol kaikai pundaun i kam daun.

Praim Minista Peter O'Neill i tokim ol lida long 2016 Lidas Samit olsem ol bikpela kampani olsem Total, ExxonMobil na Oil Search i wok long investim moa mani long PNG.

"Prais bilong komoditi i wok long pundaun i go daun long intanesenel maket tasol dispela ol biknem kampani i wok long putim moa mani i kam insait long PNG. Ol i investim bikpela bilien kina long LNG Projek," Mista O'Neill i tok.

Mista O'Neill i tok klostu taim tasol narapela bikpela LNG projek bai kamap na dispela bai kirapim planti gutpela samting i kam long PNG.

"Bai mipela i tokaut long narapela K19 bilien dola



Praim Minista Peter O'Neill

projek we bai kamap i no long taim. Dispela projek bai kirapim planti wok mani na helpim ol liklik bisnis long kirap," Mista O'Neill i tok.

Em i tok long namba tu LNG projek long Galp Provins we ol bai kolim Papua LNG Projek, we Total bai go pas na InterOil na Oil Search bai kamap ko-vensa projek patna.

Mista O'Neill i tok taim prais bilong ol samting i go daun, dispela i soim olsem gavman i mas lukluk i go insait long ol arapela samting bilong kisim mani kam insait long kantri.

"Dispela em i wanpela bikpela samting nau long dispela taim. Ol prais bilong komoditi i daun tasol ol bikpela kampani i gat bilip long ikonomi bilong dispela

kantri."

"Wantaim ol dispela salens long global maket, dispela kain ol bikpela invesmen em i sans long yumi mekim mani na givim moa sevis long pipel," Mista O'Neill i tok.

PNG i wok long bungim hevi taim prais bilong ol mineral olsem gol, kopa, na nikel i pundaun long intanesenel maket.

Prais bilong oil na ges tu i pundaun. Prais bilong ol egrikalsa komoditi tu i pundaun, Mista O'Neill i tok.

"Gavman reveniu i kam long oil na ges long yia 2011 i bin bilien kina, tasol long yia 2015 na 2016 mipela i bin glasim olsem gavman bai kisim klostu long K260 milien.

"Yupela i ken lukim bikpela pundaun long mani mak gavman i bin kisim long oil na ges.

"Nau mipela i wok long lukim dispela hevi na gavman i wok long lukluk gut long menesim gut ikonomi bilong PNG taim ol arapela kantri i bungim hevi wankain olsem yumi," Mista O'Neill i tok.

Nupela opis bilong ExxonMobil i op

PRAIM Minista Peter O'Neill i opim nupela opis bilong PNG LNG Projek, ExxonMobil PNG Limited (EMPNG) na Mobil Oil New Guinea (MONG) long Pot Mosbi las wik Trinde.

Ol opisal bilong PNG Gaman, ol bikpela manmeri i kam long hetkwata bilong ExxonMobil long Amerika, ol projek patna bilong PNG LNG Projek, ol bisnis manmeri na ol diplomatik manmeri i bin kam lukim na witnesim opisal opening bilong dispela nupela opis bilong ExxonMobil long Pot Mosbi.

Dispela nupela opis bilong ExxonMobil PNG i stap long 7 mail na em bai kamap hetkwata bilong olgeta opresen bilong ExxonMobil insait long PNG.

Menesing Dairekta bilong

ExxonMobil PNG, Andrew Barry, i tok dispela nupela opis bilding em i wanpela bikpela invesmen antap long 18.8 bilien dola (K43 bilien) invesmen bilong en long PNG.

Mista Barry i tok dispela opis em i wanpela bikpela na strongpela opis.

Mista Barry i tok opis ya i soim plen bilong ExxonMobil long mekim ol samting long hai level na hai stendat.

"Mipela i laik kamapim wanpela kain ples we mipela i ken helpim ol manmeri long PNG long mekim wok na kisim save na ekspirens. Na mipela i amamas bikos moa long 80 pesen bilong wokfos bilong mipela em ol manmeri PNG tasol.

"Dispela opis i ken kamap

bikpela sapos ExxonMobil na ol join vensa projek patna bilong mipela i groim bisnis i go bikpela long PNG," Mista Barry i tok.

Opisa ya bin bihainim intanesenel stendat long sait bilong eneji na envaironmen, na tu i bin bihainim wankain pasin na stail bilong ol konstraken we ExxonMobil PNG i bin bihainim long taim bilong PNG konstraksen bilong LNG projek.

Ol samting bilong dispela haus em ol sola penal na ges bilong hotim kol wara, ol samting bilong lukim sampela hait samting i muv, na taim bilong daunim bikpela pawa na eneji saplai.

Ol no gut wara i kamap klin gen na mipela i yusim dispela wara ya long givim wara long ol flawa gaden na gras i gro long fil.



ExxonMobil PNG Menesing Dairekta Andrew Barry, Praim Minista Peter O'Neill na Minista bilong Petroleum na Eneji, Ben Micah, i opim nupela opis bilong ExxonMobil PNG long Pot Mosbi.

PNG bai givim K5.5 milien long Fiji long saiklon bagarap

GAVMAN bai givim K5.5 milien long Fiji bihain long strongpela win ol i kolim Saiklon Winston i bagarapim ples na kilim moa long 40 manmeri tupela wik i go pinis.

Praim Minista Peter O'Neill i tok dispela mani bai go long helpim ol manmeri husat i lusim haus na ol samting long lari ol i baim ol kaikai,

marasin, na ol samting bilong haus.

"Mi bilip olsem dispela mani bai helpim planti ol tarangu manmeri husat i bin lusim sampela famili memba bilong ol, haus bilong ol, ol gaden kaikai na ol arapela samting long dispela birua bilong strongpela win," Mista O'Neill i tok.

"Nesenel Eksektiv Kaunsil (NEC) i mekim disisen long las wik Fonde long givim dispela mani i go long ol poroman bilong yumi long Fiji, husat i kisim bikpela bagarap long dispela hevi we strongpela win birua i bin kamapim.

"Dispela birua bilong strongpela win i bin kilim planti manmeri.

"Moa long 10 tausen manmeri i lusim haus na ol bisnis bilong ol.

"Long Pasifik Ailan, mipela i save helpim wanpela na narapela i go kam na yumi i helpim ol poroman bilong yumi long Fiji taim ol i stap long dispela hevi.

"Olgeta hap bilong Fiji i nidim bikpela klinap bihain long dispela

win i bagarapim ol haus, brukim ol diwai na na kamapim planti rabis.

Mista O'Neill i tok dispela kain strongpela winlong Pasifik Ailan bai kamap long bihain taim bikos long klaimet senis na yumi mas redi long daunim ol hevi bilong kain ol birua.

are you **Savings fit?**



Give your savings a workout by opening a **PLUS SAVER, TERM DEPOSIT** or **KIDS SAVINGS ACCOUNT** today.

Weekly Smartphone Giveaway:

Simply open a new **BSP Plus Saver, Term Deposit** or **Kids Savings Account** before 31st March, 2016.



www.bsp.com.pg



TRUSTEE FOR THE DEFENCE FORCE RETIREMENT BENEFIT FUND

REMINDER TO PENSIONERS

CTSL will be conducting its annual checklist suspension exercise by April 2016. Pensioners are reminded to complete an updated pension renewal form and forward to us to avoid having their pensions suspended. (Update form is enclosed)

The following pensioners are required to contact the Trustee's office as soon as possible to update their records. Beneficiaries and relatives of pensioners are also encouraged to contact the office to confirm their status as we are in the process of closing their files.

NO	NAME	NO	NAME	NO	NAME
1	ALPHONSA YAKERI	19	JULIE ALINGHAM	37	SAIDAM JOHN
2	ALQUIN TONAMATAGRA	20	KEIKI AUGUSTINE	38	SALOME IAMARCH AMOS
3	ARMELA ROPLAEN	21	KINGSTON WAKIWAKI	39	SAMSON ANDOGA
4	CAMILUS DAU	22	KLENGLI NEESKIENG THOMAS	40	SELINA SEREMU
5	COLLETTA NONI	23	LARI SIAOA	41	SEMBISEN LUCY MATHIAS
6	DARUSILLA NANUK KILALA	24	LAURIKO MOKE	42	SILIH SO-ON
7	DAVID OROHO	25	LAVIRIU BLAISE THEODORE	43	SIMARAN LEVI
8	DILIGIATO GINIYA	26	LINUS MANOI	44	SIMOI MAKULE
9	DINGA WERAGE	27	LULU KAIA	45	SOLOMON SAVO
10	EFI PETNAIS ANNE	28	MANA FOBBEY	46	TAPU SAM WAKU
11	ELIZABETH VIRIU	29	MARY KAIEH	47	ULARI SAVA
12	GABRIELLA BULEAKA	30	MASPOK JOSPINE	48	VERONICA KAMANE
13	GODWIN TOVUE	31	MATHEW YAWI	49	WAUS URAGE MIKA
14	GORIN TULE	32	MUNGE ROY MUZAMET	50	WILLIMAINA WANINARA
15	HARRY BROWN KOPA	33	MURO JOFO	51	WOWO WENA DAMBA
16	JACK MAIERA	34	PALA AUGUSTINE	52	WOYENG SOYENY BENEDICT
17	JIM ZERLINDA	35	RENPEPE ROPI	53	YAVIRIR JOHN ARIAKA
18	JONAH WEMALO	36	RULDOF TURBAT		

Contact Member Services officers on the following telephone and fax Numbers: PH 3203455/79987900/1801007 - Fax 320 1710 /321 5840
 Email us at the following address; benefits@ctsl.com.pg or visit us at www.ctsl.com.pg
 Our office is located at shop 2, Ground Floor of Defence Haus, Corner of Hunter and Champion Parade, Port Moresby and Comrade Haus, off Frangipani Street, Hohiola, National Capital District.

Authorized by

RICHARD SINAMOI
 Chief Executive Officer

Riviu bilong dispela wik...



K500 fain moni taim yu kaikai buai o salim buai long siti bilong Mosbi.

Tambu long salim buai long Pot Mosbi

NESENEL Kapital Distrik (NCDC) i tok tambu stret long salim buai long Pot Mosbi.

Man husat i go pas long tambuim buai long Pot Mosbi siti na deputi siti menesa, Honk Kiap, i tok sapos polis i holim ol manmeri i kaikai buai, tromoi buai spet nabaut o salim buai long siti, ol bai peim K500 spot fain. Sapos ol manmeri bilong brukim dispela lo i no gat dispela mani long peim fain, ol bai go long kalabus. Mista Kiap i tok buai i wok long bagarapim gutpeal siti bilong yumi na ol manmeri i mas yusim het na bihainim lo stret. Palamen i bin

Ol buai sela i wok long sakim tok na brukim lo taim ol i wok long salim buai long Mosbi siti.



kamapim wanpela lo las yia long tambuim bisnis bilong buai na tu long stopim ol manmeri long salim buai long siti na Tasol ol manmeri i wok long brukim dispela lo na salim buai insait long Mosbi siti.

"NCDC bai no inap givim sans long ol manmeri husat i brukim dispela lo. Mi toksave long pablik long no ken salim buai na daka. Ol i husat

i kisim buai i kam insait long siti i mas kisim was gut.


"Sapos mipela i holim yu, yu bai go long kalabus o baim K500 spot fain. Ol man bilong kaikai buai na spetim buai spet nabaut tu i mas stopim dispela kain pasin. Emi pasin no gut. "Yumi mas lukautim siti bilong yumi. Yumi lukautum Mosbi," Mista Kiap i tok.

Sumatin tok tenkyu long Bando

WANPELA sumatin bilong PNG Institut ov Pablik Edministresen (PNGIPA) i tok tenkyu long Hela Provinsal Edministresen i baim skul fi bilong ol sumatin long skul.

Richard Agiru, husat i skul long PNGIPA aninit long sponda bilong Hela Provinsal Gavman, i tok tenkyu long Hela Provinsal Edministreta William Bando i luksave long nid bilong ol sumatin na baim skul fi.

Mista Agiru, husat i stadi long Diploma in Pablik Edministresen, em i wanpela bilong 6-pela sumatin i kam long Hela na i skul long



Richard Agiru

PNGIPA aninit long sponda bilong Hela Provinsal Gavman.

"Mipela i amamas long gutpela pasin Hela Provinsal Gavman na Provinsal Edministreta William Bando i soim

long sapotim mipela long skul," Mista Agiru i tok.

"Mi makim maus bilong ol arapela 5-pela poroman bilong mi na tok tenkyu long Mista Bando i helpim mipela.

"Mipela bai pinisim skul gut na go bek long Tari long kirapim nupela provins bilong yumi," Mista Agiru i tok.

Em i salensim ol arapela Memba bilong Hela long luksave long nid bilong ol sumatin na sapotim ol long skul bikos Hela i no gat planti save manmeri long kirapim nupela provins.



COMRADE TRUSTEE SERVICES LIMITED

TRUSTEE FOR THE DEFENCE FORCE RETIREMENT BENEFIT FUND
 P.O Box 497, Port Moresby, Phone: 1801007/3203455/79987900 Fax: 3201710 Email: benefits@ctsl.com.pg

PENSION PAYMENT RENEWAL FORM

1. Pensioner Name:
 Service Number: Pension Number:
 Date of Birth: / / Date of Discharge: / /

2. Type of Pension (Please Tick appropriate boxes)
 Retirement Widow Child Medical Power of Attorney (POA); if yes...
 Name of POA:
 Relationship to Pensioner:

3. Address & Contact Details
 Postal Address:
 Residential Add:
 Land Line: Mobile:
 Fax: Email:

4. Bank Account Details

Account Name	<input type="text"/>
Type Of Account	<input type="text"/>
Account Number	<input type="text"/>
Bank	<input type="text"/>
Branch	<input type="text"/>

Pensioners Signature: _____ Date: ____/____/____

Office Use Only

CTSL		
Received by:	Date: ____/____/____	Signature: _____
Checked by:	Date: ____/____/____	Signature: _____
KISS		
Checked and Verified by:	Date: ____/____/____	Signature: _____

Notes: _____

Yangpela manmeri i klinim Giburi Strit, Morata 1

Allan Titus Kapin i go pas long klinim ples...

MOA long 100 yut bilong Giburi Yut Asosiesen bilong Morata, Nesenel Kapital Distrik i laik mekim ol komyuniti wok na klinim ples.

Dispela em i namba wan taim long ol yangpela manmeri long Morata i apim han long mekim ol komyuniti wok we i no gat potnait mani.

Morata em i wanpela ples no gut insait long Pot Mosbi we planti raskol pasin i save kamap. Tasol nau ol dispela yangpela manmeri i les long mekim pasin no gut na ol i kirap na senisim pasin long bringim senis i kam long komyuniti.

Presiden bilong Asosiesen, Allan Titus Kapin, i tok namba wan wok bilong ol yut i kamap las wik taim ol yangpela manmeri husat i save stap long Morata 1 i klinim Giburi Strit long las wik Sarere.

Dispela em i namba wan wok ol i mekim tasol ol i tingng long mekim planti komyuniti servis wok.

Ol yangpela manmeri i bin kirap long 5:30 monin na klinim strit wantaim ol brum, rek, savol, bus nait na wilbaro.

Ol papamama na ol bikpela manmeri tu i bin kirap nogut na amamas wantaim, ol i joinim ol yangpela manmeri i klinim 2 kilomita Giburi Strit.

Dispela i lukim Giburi Strit i kamap klin na nais tru taim ol i bin klinim olgeta pipia arere long rot na long sait sait bilong strit.

Giburi em i wanpela strit insait long Morata we planti raskol pasin i save kamap tasol nau planti ol gutpela manmeri i kam stap.

Planti ol yangpela manmeri husat i pinisim skul long yunivesiti na ol kolis tu i kam statim nupela marit laip bilong ol long Giburi na ples i nau pulap long ol gutpela manmeri.

Dispela i lukim level bilong pasin no gut i pundaun i kam daun na ol yangpela manmeri i laik stat mekim ol gutpela samting long komyuniti.

Mista Kapin i tok ol lapun manmeri na ol papa mama i bin amamas stret taim ol i bin lukim ol yangpela manmeri i senisim pasin na mekim gutpela samting long komyuniti.

"Planti ol yangpela manmeri i harim stori olsem mipela wan wan i klinim dispela strit na ol i laik joinim mipela.

"Neks wiken mipela bai klinim Morata Haus Sik na mipela i save olsem planti ol yangpela manmeri bai kam joinim mipela long dispela wok," Mista Kapin i tok.



Em i tok wanpela as bilong kirapim dispela asosiesen em long helpim ol yangpela manmeri senisim pasin bilong ol na long larm ol i kamap gutpela manmeri insait long komyuniti.

Taim ol i mekim dispela kain ol komyuniti wok, ol i ken stretim laip bilong ol yet na redi long

painim sampela gutpela wok long bihain taim.

"Dispela i ken daunim level bilong raskol pasin insait long komyuniti.

Mipela i laikim ol yangpela manmeri i no ken dring stim a hombru, ol i no ken smokim spak brus, ol i

no ken kisim Sik AIDS, tasol ol i mas stap gut na mekim ol gutpela pasin long kirapim dispela kantri bilong yumi," Mista Kapin i tok.

Em i tok dispela asosiesen i lukluk long kirapim ol liklik bisnis olsem SME na i tingting long helpim ol yangpela manmeri ya

long painim gutpela wok mani o liklik bisnis lng saptim ol yet long laip.

"Dispela i ken daunim ol hevi na pasin no gut ol yangpela manmeri i save kamapim na helpim ol long kamap gutpela manmeri bilong dispela kantri," Mista Kapin i tok.

Malabag opim nupela dabol klasrum

Frieda Sila Kana i raitim

MEMBA bilong Pot Mosbi Not Wes, na Minista bilong Helt, HIV na AIDS, Michael Malabag las wik Fraide i opim gen narapela tupela stori haus wantaim 4-pela klasrum long June Valley Prameri Skul long Tokarara, Nesenel Kepital Distrik.

Dispela klasrum em i wanpela bilong ol bikipela projek bilong Mista Malabag aninit long Distrik Sapot Impruvmen Fan (DSIP) bilong ilektoret bilong em, long mani mak bilong K800,000.00.

June Valley Prameri Skul em i wanpela olupela skul tru i stat long 1960 olsem wanpela intenesenel skul, tasol i luk olsem long planti yia i go skul i no bin kisim planti senis tumas long ol skul infra-straksa.

Olpela het tisa bilong June Valley Pramer skul, Misis lamo i tok, dispela klasrum em i wanpela bikipela developmen bihain long planti yia.

Brian Ovia, het tisa bilong June Valley Pramer skul i tok tenkyu



Pot Mosbi Notwes memba na Minista bilong Helt, HIV na AIDS, Michael Malabag i katim ribon bilong wanpela dabol klasrum bilding i gat 4-pela klasrum insait. Foto: Nicky Bernard

long Mista Malabag long dispela klasrum.

Mista Ovia i tok skul i gat 28 tisa na 27 klas wantaim 5-pela klas long wan wan gret stat long gret 6 i go long gret 8, na tripela klas bi-

long gret 3 i go long gret 5.

I gat sampela klasrum i stap tasol em i gat tupela haus tasol bilong ol wokman insait long banis bilong skul we i no gutpela tumas long man i stap long en.

Mista Ovia i tok moa olsem ol tisa nau i stap long ol setelmen haus we i no gutpela long famili bilong ol, olsem na em i askim memba long wokim wanpela dupeks haus bilong ol tisa long stap

insait long skul.

Mista Malabag i tok long stori bilong June Valley Pramer skul, em i bin helpim wantaim wanpela ablusen blok long mani mak bilong K80,000, wanpela wara tenk, na ol semen bilong wokabout long mani mak bilong K200,000.

Tasol em i tok, sampela wok bilong DSIP projek long ol narapela skul insait long Not Wes ilektoret i no hariap long kirap, maski em i putim mani i go pinis.

Olsem na Mista Malabag i gat bikipela amamas long lukim ol wok kamap olsem long June Valley Pramer skul, Sen John Aposel Pramer skul long June Valley, na Hagara Pramer Skul na long June Valley yet.

Em i tok nau 2016 em i yia bilong tokaut long ol projek wok bilong 2015 na long opim ol klasrum na ol kain kain projek insait long ilektoret bilong em.

Dispela klasrum long June Valley Pramer skul em ol Laiva Konstrak-sen I bin wokim insait long 6-pela mun tasol.

Restoretiv Jastis Trening kamap long Lae

Stori na poto i kam long PNGCPP komyunikesen

WANEPILA Restoretiv Jastis Program i bin kamap long Lae Siti long wanpela komyuniti i stap long baksait rot we i lukim 50 manmeri i kisim trening long namba wan de.

Gini Kevin husat i Projek

Kodineta bilong ol lain husat i save kisim birua long han bilong ol trabel man na ol lain husat i ranawe long hevi na Juvinaill Jastis Program wantaim Nesenel na Suprim Kot na Salvesen Ami long PNG i bin go pas long dispela tupela wik trening.

Em i bin singautim olgeta lain bi-

long lukautim lo insait long Lae Siti long ol i givim ol trening na tok skul long ol lain husat i stap long trening.

Mista Kevin i tok dispela trening em bilong kamapim luksave olsem ol rong pasin na pasin bilong brukim lo i save bagarapim ol pipel.



Gini Kevin – Man i go pas long Program bilong Juvinaill Jastis aninit long Salvesen Ami na Nesenel na Suprim Kot long Lae i ranim trening.

Program i soim long wanem kain pasin i save bagarapim sindaun bilong ol komyuniti na famili long ples.

Restoretiv Jastis i traim long givim sampela strong i go bek long komyuniti na ol pipel husat i bin kisim birua long ol yet inap long kamapim jastis long ples bilong ol.

Salvation Ami long PNG wantaim mani i kam long Australian Eid Program bilong Sios Patnasip Program i helpim long ranim ol dispela trening.

Mande Februeri 22, 2016 Joe Saferius wanpela Teknikel Kopresen Asisten Program, Kaunta Trefiking wantaim ol PNG we i wok wantaim IOM Intenesenel i bin toktok long Human Trefiking o pasin bilong stilim ol man bilong wanpela hap na karim i go long narapela hap o kantri.

Mista Saferius i tok klia long ol lain long trening long ol lo na ol mekim save bilong pasin bilong stilim ol narapela man o meri. Em i tokaut tu long sampela bikipela indastri we ol kain pasin i save kamap, olsem ol fiseries na loging indastri. Planti bilong ol dispela lain i bilong Esia.

Planti bilong ol lain i bin kamap long trening em ol yangpela man na meri we i kam long ol setelmen klostu long Salvesen Ami Sios long Lae siti baksait rot.

Restoretiv Jastis Trening i laik lainim na strongim ol yangpela long mekim wok bilong jastis long hap bilong ol yet na long stretim ol hevi i save kamap long wan wan de.

Insait long trening ol i bin inap long luksave long ol kain kain mak we ol lo ejensi i stap na long wanem kain we ol inap helpim ol komyuniti. Ol i kisim sans long lainim ol rait bilong ol, konstitusen o mama lo na ol Human Rait Lo.

Mista Kevin i tok, taim ol komyuniti long taun na siti i save long ol hevi bilong lo na ol jastis bai ol inap long helpim ol polis na ol narapela lain bilong lukautim lo long mekim gutpela wok long komyuniti na daunim hevi bilong lo na oda long kantri.

I gat 17 bikipela tingting bilong CPP program insait long dispela program na dispela trening i karamapim.

Ol dispela eria olsem Jenda Ikwaliti, Proteksen ov Human Raits, Patnasip, Tras na Akauntabiliti na sampela moa.



Sampela ol yangpela man na meri long ol setelmen husat i bin stap long trening.

Efogi opim nupela dabol klasrum

Kikori Sekendri Skul i kisim skul trak



Minista Kaunselu bilong Australia Hai Komisen Rod Hilton i givim ki bilong nupela klasrum i go long Donah Joremba, asisten tisa bilong Efogi Elementri Skul

KOKODA Inisetiv i wokim moa wok long sapotim edukesen, wara saplai na senitesen i go long ol ples arere long biknem Kododa Trek.

Long 23 Februari Kokoda Inisetiv i opim wanpela nupela dabol klasrum wantaim tupela nupela haus bilong wokman, na ol ablusen o toilet blok bilong Efogi na Kavovo ples.

Ol nupela haus i bin kam long mani bilong Australia Gavman aninit long Kokoda Inisetiv, wanpela patnasip namel long Australia na Papua Niugini long banisim Kokoda Trek rijon long bringim ol sevis i go long ol komyuniti bilong en.

Ol nupela klasrum bai holim moa long 272 sumatin na 13 tisa long Efogi, Kavovo na ol arapela ples klostu olsem Launamu, Kagi, Naduri na Manari.

Ol tisa long Efogi Praimeri Skul bai i no moa holim ol elementri klas bilong ol insait long komyuniti haus bilong ples, bikos ol i gat gupela klasrum long skul.

Tisa in sas long Efogi Elementri Skul, Joyce Sam, i tok taim ol i save yusim komyuniti haus, ol i save kenselim ol klas long taim ol narapela lain i yusim haus o no gat ol i save holim klas aninit long ol diwai.

“Nau mipela i no inap long kenselim klas o go aninit long diwai bikos mipela i gat klasrum bilong mipela yet. Mi wantaim ol sumatin bilong mi i amamas tru na bikpela tenkyu i go long gavman bilong Australia long givim dispela nupela haus,” Mis Sam i tok.

Nupela haus bilong wokman bai helpim long holim ol tisa long ol bai no inap ranawe i go bikos i no gat haus bilong slip. No gat haus tisa i bin wanpela bikpela hevi long dispela tupela ples longpela taim.

Rod Hilton, Minista Kaunselu bilong Australia Hai Komisen i tok, “Gavman bi-

long Australia i amamas long sapotim ol sevis i go long ol komyuniti o ples arere long rot bilong Kokoda Trek.”

‘Australia i putim mani long kamapim gupela helt, edukesen na wara na senitesen long Trek, stat long Depo long Sentral Provins, i go olgeta long Kokoda, Kanga na Gorari long Oro Provins’. Long dispela taim, Australia i wokim pinis 50 helt na edukesen infrastraksa, we sampela ol i stretim tasol 16 em ol nupela dabol klasrum insait long Kokoda Trek rijon.

Mista Hilton i givim wanpela kopi bilong wanpela buk “Voices from the War – em i stori bilong ol Papua Niugini soldia na keria husat i bin stap long wo o bikpela pait long Kokoda wantaim ol Australia soldia long taim bilong Wol Wo II. Em i lusim bilong ol komyuniti long ritim. Australia gavman i fandim ‘Voices from the War’ projek aninit long inisetiv.

KIKORI Sekendri Skul long Galp Provins i bin kisim wanpela nupela skul trak we Petroleum Risos (PRK) i givim ol long las wik Trinde.

Nupela trak, em i wanpela 10 sita len krusa, bai save helpim skul long bringim ol saplai bilong ol i kam long ol narapela hap ausait long skul.

Ol sumatin i tok tenkyu wantaim wanpela song na drama ol i pilai long ol hat taim ol i save bungim long karim ol kago bilong ol long sip bris i go long skul o taim ol i save haia long PVM trak long kisim ol kago bilong ol i go insait long Maun Hagen.

Insait long wanpela liklik seremoni, Prinsipel bilong skul, Collin Sauka i kisim ki bilong dispela trak long hans bilong MRDC Jeneral Menesa, Eksteneel Afes na Sastenebel Dvelopmen, Imbi Tagune.

Mista Tagune i toktok strong long ol skul i mas lukautim gut trak na putim long sevis planti taim long em inap stap longpela taim long helpim skul.

Planti lokal papa graun wantaim prinsipel na bod ov menesmen i tokaut long ol hevi ol i save bungim long taim ol i no bin gat trak na tu long pasin we gavman i lusim tingting long ol.

Bod Siaman, Soba Samai i



Ol skul sumatin bilong Kikori i amamas long nupela trak bilong skul. Em bai mekim bikpela wok long ol inap toktok wantaim ausait lain.

tokaut olsem Kikori Sekendri skul em i wanpela bilong ol skul i stap long lista bilong kisim helpim i kam long UBSA, LBSA na MoA aninit long Oil na Ges Paipain Agrimen we ol i bin sainim long yia 2009.

Ol i bin wokim skul long yia 1998 aninit long Takis Kredit Skim bilong pastaim Chevron Niugini Limited. Bihain long dispela nau moa long 17 yia i go pinis na skul i no bin kisim wanpela mani bilong em i ranim edministresen bilong en.

Ol i kisim ol lain i makim MRDC long lukluk raun long skul long lukim ol klasrum i stap rabis tru wantaim tu ol haus tisa. Skul Prinsipel, Sauke i tok em i gat bikpela wari long mentenens bilong

ol haus tisa, klasrum na haus kaikai bilong ol sumatin bikos ol i stap bagarap tru. “Mipela laikim wanpela man o meri long kam long Kikori na sevim mipela long dispela hevi,” Mista Sauka i tok.

I no gat ples balus na narapela we bilong toktok long ausait lain, taso i gat wanepela bot tasol i save ranamel long Kerema o long trak long bihainim rot bilong paipain rot long Moro long Sauten Hailans provins. Tasol dispela em i bus rot tasol nau bihain long PNG LNG Projek i pinis.

Nau ples balus em i pas olsem na wanpela rot tasol long go long ausait o kisim ol samting i kam long ausait em long rot bilong kar tasol.

Dispela kar bai helpim skul long bikpela wei. Mista Tagune bilong MRDC i tokim ol sumatin na ol tisa olsem kampani i luksave long ol hevi bilong skul na em bai helpim long wanem kain wei em inap long helpim long bihain taim. Petroleum Risos Kumul o “PRK, we MRDC i save bosim, em i wanpela pren bilong ol Kikori, na em bai wok patna yet wantaim yupela ol Kikori pipel long sapotim edukesen long hia,” Mista Tagune i tok.

Kikori eria i stap aninit long Paipain Laisens 2 (PL 2) eria we Oil Search i save ranim Kutubu Petroleum Projek.

Petroleum Risos Kutubu aninit long MRDC i save makim ol papa graun.



Minista Kaunselu bilong Australia Hai Komisen, Rod Hilton i opim nupela dabol klasrum long Efogi viles.



Nupela haus tisa long Efogi Praimeri Skul.



I sumatin long Efogi na komyuniti memba long taim bilong opim klasrum na haus tisa long Efogi.

Helt Sapot Wokas i gat nupela eksekyutiv

PNGHSA log ov kleim bai orait nau

Frieda Sila Kana i raitim
PNG Helt Sapot Wokas Asosiesen nau i gat ol nupela eksekyutiv opisa bilong ranim wok bilong dispela yunien.

Ol dispela eksekyutiv em Roslyn Melua olsem Presiden ilek, Michael Larau olsem Senia Vais Presiden, Rita Leko olsem Vais Presiden, Brian Teddy olsem Tresera na Jack Suao olsem Jeneral Seketeri.

Asisten Ileksen Menesa bilong PNG Iltektorel Komisen long Pot Mosbi, Roslyn Tabogani i bin stap long tokaut long ol dispela eksekyutiv. Ms Tabogani i tok, ol dispela 5-pela em nominesen bilong ol i no bin gat lain long salensim ol, olsem na Iltektorel Komisen i kisim tasol ol dispela lain husat i kisim nominesen long ol dispela posisen.

Bihain long ol nupela eksekyutiv i kisim opis, Presiden ilek, Roslyn Melua i tokaut olsem nau Jeneral Seketeri, John Suao bai kisim posisen bilong em olsem Jeneral Seketeri bilong asosiesen. Dispela tokaut seremoni i bin kamap long hap bilong Pot Mosbi Jeneral Haus sik (PMGH) HR opis we Sif Eksekyutiv Opisa (CEO) bilong PMGH, Grant Muddle wantaim ol eksekyutiv memba bilong ol narapela Helt wokas yunien i bin stap long lukim.

PNGHSA em i wanpela yunien grup insait long Helt Dipatmen we i stap bilong helpim ol helt sapot wokas husat i no save mekim kilinikel wok. Nupela presiden ilek, Roslyn Melua i tok, nau ol i gat 3,000 memba i rejista na ol i bilip olsem

pastaim long dispela yia i pinis, ol bai kisim olsem 8,000 rejista membas.

Dispela ol memba em i karamapim Nesenel Kepital Distrik wantaim narapela 13 provins.

Dispela ileksen i makim ol nesenel ekskyutiv na tu long ol 13 narapela provinsal eksekyutiv. I gat 15 provins tasol Is Nu Briten na Wes Nu Briten I no bin go insait long makim ol provinsal ekskektiv bilong ol bikos long Is Nu Briten em i no bin gat nem long nominesen na long Wes Nu Briten ol memba i no bin wanbel long nominesen. Ol bai mekim wok wantaim ol wasman na wasmeri opisa inap bihain taim ol i makim ol nupela ekskektiv insait long yia.

Mista Grant Muddle, CEO bilong Pot Mosbi Jeneral Haus sik i bin

tokim ol memba na ol eksektiv bilong PNG Helt Sapot Wokas Asosiesen olsem, ol i mas bihainim gut wanem samting ol i tok long mekim na ol i no ken traim long mekim ol wok bilong operesen bilong ol haus sik.

"Yupela i mas mekim wok bilong sata bilong yupela we i stap long Tems na Kondisen bilong yupela long lukautim welfe bilong ol wokman long ples bilong wok na i no long mekim toktok long ol operesen bilong haus sik.

"Mi no gat hevi long wok bilong ol yunien, mi save strongim ol yunien tasol tasol mi laikim olgeta yunien i mas wok bung wantaim na kam olsem wanpela maus tasol na no ken kam olsem planti yunien," Mista Muddle i tok.

Frieda Sila Kana i raitim

PNG Helt Sapot Wokas Asosiesen nau bai inap long putim kleim bilong ol long 11-pela log ov kleim bilong ol we interim eksektiv bilong ol i putim i go pinis long Dipatmen bilong Pesenel Menesmen.

PNG Helt Sapot Wokas Asosiesen em i yunion bilong ol helt woka we i no save wok wantaim marasin na sikman, tasol ol i save holim ol bikpela wok we i save mekim ol wok bilong givim marasin i kamap gut na long taim. Em ol kain lain olsem ol opis edministresen opisa, ol klina, ol draiva, na ol narapela.

Nupela presiden bilong PNGHSA, Roslyn Melua i bin tok long taim bilong tokaut long ol nupela eksektiv long Mande

29 Februari long Pot Mosbi olsem ol i bin pinis kleim bilong 11-pela erias bilong ol alauwens bilong ol i go long opis bilong personal menesmen.

Sampela bilong ol dispela log ov kleim olsem; Domestik Maket Alauwens, Travel Alauwens, risk alauwens, insurens, ova taim, Mental Helt Alauwens na malolo bonus pe K1,000. Moa long dispela ol wokman na meri bai kisim bek pei i karamapim las 5-pela yia i go bek.

Jeneral Seketeri na fauna bilong asosiesen, Jack Suo em bai wokim ol edministresen wok na em bai kamap tim lida bilong bihainim ol toktok bilong ol dispela kleim.

Mis Melua i tok, dispela em i stat tasol bilong wok bilong dispela yunien, tasol em i no bilong wok egens

long gavman, nogat. Dispela yunien em bai wok bung wantaim gavman long kamapim gutpela ples wok na pei bilong ol wokman na wokmeri.

"I gat bikpela salens i stap long rot bilong mipela nau, na mipela i nidim olgeta sapot bilong PNG Helt Woka Asosiesen long mekim dispela wok," Mis Melua i tok.

Mista Jack Suao i tokim ol lain memba olsem ol helt benefit bilong ol i stap klostu pinis. Na sapos i gat rot blok long Dipatmen bilong Pesenel Menesmen, em bai go bek long ol memba.

"Log 40 yia ol i bin lusim tingting long yu. Tasol nau bai yu kisim K400. Olgeta wan wan helt woka bai kisim, ol lain long klinikel na ol lain i no wok long klinikel wantaim," Mista Suao i tok.

Gavman i mas mekim wok long stopim Vailens

Frieda Sila Kana i raitim

OL Dokta i No gat Mak o MSF, wanpela medikal intenesenel NGO, we i save wok long ol hap kantri we i save gat bikpela pait na netsurel disasta na birua, i wari olsem lo na jastis long Papua Nlugini i no mekim inap wok long banisim ol meri na pikinini long pasin bilong ol i painim birua insait long haus o famili bilong ol yet.

MSF long kantri i bin autim wanpela risets wok bilong ol long hevi bilong Vailens egensim ol meri na pikinini long Pot Mosbi na Tari, Hela Provins long Tunde 1 Mas insait long Laguna Hotel long Pot Mosbi insait long wanpela nius konprens.

Hed ov Misin bilong MSF long PNG Angelika Herb, Operesens Menesa Beyond Medikal Ke, Christian Katzer na Operesen Tieta Nes long Tari seif haus, Aoife Ni Mhurchu i bin tokaut long wok painimaut we ol i bin mekim wantaim 3,056 lain husat i save ranawe long hevi o birua ol i kisim insait long famili bilong ol yet, insait long yia 2015.

Mis Herb i tok maski ripot em i bilong sotpela taim tasol, MSF i bin stat long yia 1992 long PNG na long 2007 ol i bin opim namba wan famili na seksual vailens klinik long Lae.

Bihain ol i bin go long Tari, Pot Mosbi na Milen Bei wantaim Is Sepik Provins.

Insait long ol yia ol i bin wok long PNG, ol MSF i lukim pinis 28,000 moa man, meri na pikinini husat i kisim birua long vailens na i kam



L-R Angelika Herb, MSF Het ov Misin long PNG, Oeresens Menesa Beyond Medikal Ke, Christian Katzer na Operesen Tieta Nes long Tari seif haus, Aoife Ni Mhurchu long nius konprens long dispela wik. Foto: Josiah Ururu Kana

Wanpela 13 yia pikinini meri i sinddaun long banisim rum bilong ol pikinini long Famili Sapot Senta long Tari. Em i wokabut i go long klinik wantaim mama bilong em taim wanpela man long ples husat i repim em tupela taim pinis bipo, na i laik repim em gen. Foto: MSF PNG Misin



Ol 4-pela meri i sinddaun ausait long Sejikol Wod long Tari Haus sik long kisim marasin bihain long ol i kisim hevi long ol man o famili bilong ol. Foto: MSF PNG misin

long ol helt ke senta o haus sik we ol i wok long en.

Mis Herb husat nau i stap 11 mun olsem Het ov Misin long PNG, i tok olsem insait long dispela wok painimaut, ol i lukim olsem 94 pesen o 19 bilong 20 meri husat i ranawe wantaim bagarap long bodi na i go long haus sik bilong ol, em ol i painim birua long famili bilong ol yet.

Ol man bilong meri, papa, brata o kandre i save kamapim birua long ol nogat, em ol i kisim long ol narapela man we ol i save gut long ol.

Ol dispela lain i save ranawe wantaim bikpela sua o bagarap, we ol i kisim long naip, akis o tamiok, ston, ain, stik o sampela hevi samting bilong kilim na bagarapim, sampela klostu long dai.

Mis Herb i tok, bikpela hevi moa i stap long ol papa na ol narapela bikpela lain i paitim na bagarapim ol pikinini.

"Mipela i lukim ol liklik pikinini tru i kisim bikpela hevi bilong pait o vailens. Na planti taim dispela hevi i save kam long ol famili bi-

long ol yet. Sapos mipela i lukluk long seksual vailens, i winim hap namba we ol MSF konsalten i lukim em ol pikinini.

Moa long 80 pesen bilong ol i gat krismas i aninit long 15. Na wanpela namel long siksipela pikinini em i gat krismas aninit long 5," Mis Herb i tok.

Ripot i tok tu olsem moa long ol meri na pikinini i save kam long painim helpim em ol lain we ol man o famili bilong ol i repim ol long haus bilong ol yet olsem na ol i save husat i bagarapim ol.

Tasol lo bilong kotim ol dispela trabel man i no strong tumas inap long helpim ol dispela meri na ol pikinini husat i laik ranawe long hevi bilong seksual vailens na tu long kotim ol em i no inap.

Long dispela as, MSF het ov misin i tok, ol i givim ripot pinis long Seketeri bilong Yut, Meri, Sios na Komyuniti Dvelopmen, Anna Solomon long gavman i mas hariap long strongim lo bilong "Lukautim Pikinini Ekt" bai em i ken opim rot bilong ol lain i kisim bagarp i ken kotim ol trabel man na tu long ol i ken ranawe na kisim helpim long narapela hap.

Nau yet long kantri, i gat 7-pela ples tasol long ol lain i kisim hevi olsem ol mama na pikinini inap ranawe na hait long en, tasol long sotpela taim tasol.

Na 5-pela bilong dispela ol seif haus i stap long Pot Mosbi siti tasol.

Ol MSF i tok ol i laikim gavman i mas putim ol lo na hap bilong banisim ol meri na pikinini husat i laik ranawe long vailens o seksual vailens, bikos planti taim ol i save go bek gen long sem ples we ol i kisim hevi na we birua man i stap long en. Ol i no gat narapela hap long go, o bikos ol i no helpim ol.

Ol MSF i laik lukim stretpela pasin i mas kamap long ol dispela lain na ol narapela husat moa bai kisim wankain hevi seksual vailens long bihain taim.

PNG i gat bikpela hevi i stap long olgeta hap bilong kantri bikos ol man i no gat rispek long laip bilong ol meri na pikinini olsem ol tu i man wankain olsem ol.

DIVAIN Wod Yunivesiti i lusim wanpela gutpela leksera

DIVAIN Wod Yunivesiti I lusim wanpela gutpela leksera, brata, na pren bilong olgeta long las wik. Salvador Teodoro Pasilaban Junior na sotpela nem we planti I bin kolim em, Jun Pasilaban, i bin dai long haus sik long Madang.

Jun Pasilaban I bilong kantri Filipin tasol em I bin kam long PNG 20 krismas I go pinis long wok long Divain Wod Institut taim em I no yunivesiti yet, bihain long singaut bilong Sistrer Janet SSpS long go wok long hap.

I kam inap em I dai, em I bin wok long fakalti bilong Bisnis Stadis na em I bin skulim planti handet sumatin husat bai I tingim em olsem wanpela gutpela tisa na pren.

Em I namba 4 pikinini long famili I gat tripela pikinini man na tupela pikinini meri.

Long funerel misa lotu sevis we DWU I bin holim, ol toktok we ol save alin I bin wokim I bin toktok long gutpela pren, man bilong laikim na helpim ol narapela, stap amamas na poroman


wantaim olgeta lain na gutpela komitit wokman.

Em I bin skul long Filipins yet na go skul long bikpela na olpela Yunivesiti bilong Santo Tomas na greduet olsem Basela bilong Bisnis long Komes na Meja long Akaunting.

Em I bin wokim ol arapela pos greduet skul gen bihain olsem Biblikel Stadis na Apostulet (olsem na Pater John Ryan I save kolim em long "Bisop"), na holim ol kain wok olsem benk brens menesa trenna, bisnis ripota trenna, tioloji tisa, fainnesel kontrola bilong wanpela kampani, akaunten bilong sampela kampani pastaim na bihain em I bin kamap tisa.

Long sait bilong lotu, em I bin wanpela Lijen Misineri na dispela I bin kisim em I kam long PNG.

Em I laikim wok bilong em long PNG na maski ol I singautim em I go bek wok long Filipins, em I bin tok no gat na stap bek yet long wok long Divain Wod long Madang.



Salvador Teodoro Pasilaban Junior .



Funeral sevis bilong leit Jun Salvador Teodoro Pasilaban long Madang i bin kamap long dispela wik.

"Save na mekim"

I kam long liklik buk, Stori na Wok, Elizabeth Cox i raitim

Mals

Skruim i kam long las wik

Toksave: Mals em i wanpela nupela lo olgeta long wok gaden. Tasol sapos yu bihainim gut bai yu lukim wok gaden bilong yu i moa isi, na graun bilong yu i gat moa gris.

Tok insait long mals em i olsem: Taim yumi dikim wanpela gaden, o planim wanpela diwai prut, yumi no save larim graun i stap nating we san i kukim o ren i wasim.

Yumi mas karamapim dispela graun long ol drai gras na lip olsem graun bai holim wara, i no ken drai tumas, na ren i no ken paitim graun na pasim ples bilong win na wara wantaim long go insait long rop bilong kaikai.

Yumi kisim dispela ol gras na lip na malsim o karamapim graun.

Mals i gat sampela narapela wok tu.

Em i save karamapim graun na mekim tudak aninit, olsem na ol rabis gras i no nap kamap.

Na tu dispela mals o gras bai sting isi – isi na kamap graun gen, na dispela i save grisim gut graun, redi long wanem kain kaikai yu laik planim bihain.

Taim wanpela kaikai i pinis na yu laik dikim graun gen long planim nupela kaikai, bai yu dikim na miksim dispela sting mals, o gris i go daun long graun. Bamba yu inap mekim graun bilong yu i kamap bilak moa na malumalu tru.

Ol mama inap long mekim Wanem?

Ol mama mas traim hat tru long bihainim dispela lo bilong malsim o karamapim graun long ol gaden kaikai.

Yu inap katim ol kunai (sapos i no gat pikinini) na slipim gut antap long graun. Karamapim gut tru, olsem yu no inap long lukim graun aninit long em.

Sapos yu no gat ol kunai yu ken bungim ol drai lip i save pundaun na karamapim graun insait long bik bus.

O yu ken yusim dispela mosong bin yumi save planim insait long ol lain kokonas, kopi o raba.

Em ol i kolim PERARIA BIN. Katim liklik liklik na karamapim graun. Em i bin, olsem em bai grisim gut graun. Na wanpela isi we tru em long lainim wanpela kain gras, raun long arere bilong gaden. Ol i kolim dispela gras smel kunai o muli gras bikos lip bilong em i smel olsem muli.

Sapos dispela gras em i stap raun long gaden yu ken katim olgeta taim long karamapim wanem nupela gaden yu wokim. Dispela gras bai i stap na kamap bik gen, na bihain yu ken katim gen long kisim mals.

Stretim ol hevi bilong ol haus kalabus insait long kantri



KOMENTRI

BIKPELA hevi i kamap long Lae nau. Bikpela lain kalabus i bin ranawe las wik na polis i sutim 12-pela bilong ol na holim 18. Tasol 64 kalabus i hait nabaut long bus i stap yet.

Ol polis na bikbos bilong Koreksenel Sevis (CS) i mekim strongpela tok lukaut i go long ol dispela kalabus long givap nau na givim ol yet i go bek long han bilong lo. Em i tokim ol famili na pren tu long no ken haitim ol dispela lain bikos ol i trabel lain.

Bihain long disepla hevi i kamap, ol bikbos long Mosbi i rausim opisa husat i go pas long lukautim wok bilong Koreksenel Sevis long Morobe. I gat bikpela moa wok painimaut i kamap nau long as bilong dispela hevi. I gat kain kain toktok i kamap. Sampela i tok ol kalabus i ranawe bikos i no gat spes bilong slip, i gat planti kalabus tumas i stap insait long liklik haus olsem na ol i les na ranawe. Sampela i tok ol kalabus i wet long taim tumas long kamap long kot olsem na ol i ranawe.

I gat kain kain tok i kamap. Ol CS long Buimo i tok i no gat apointment tru i kamap long makim wanpela opisa long bosim wok. I gat ekting bos tasol na em i no inap long mekim ol bikpela disisen. I gat ripot i tok tu osem ol i



sot long ol woda long lukautim ol kalabus. Planti bilong ol em ol meri opisa na ol i no inap long kontrolim bikpela namba bilong ol man kalabus.

Bihain long ol wok painimaut i kamap ating CS dipatmen bai inap long stretim sampela bikpela bevi long Buimo. Hevi bilong ol kalabus i ranawe em i no nupela samting. Oltaim yumi save harim dispela nius long ol kalabus i

ranawe long ol haus kalaus o ol polis sel o ol ruel lokap. Em i no nupela samting.

Wok bilong Koreksenel Sevis em i bilong lukautim ol kalabus. Long taim kot i salim trabel man o meri i go kalabus, CS bai lukautim ol inap ol i pinis kalabus na go bek long ples o famili. Wan wan provins i gat haus kalabus na ol opisa na woda i stap. Namba wan wok bilong ol em long lukautim ol

kalabus olsem na i mas gat inap woda long mekim dispela wok.

Gavman i mas hariap long stretim wanem kain hevi i kamap long wok bilong CS. Long las mun, Minista bilong CS i bin makim nupela komisina. Pasin em i bihainim long tokaut long nupela apoinmen i no bin bihainim stretpela rot bilong makim nupela bos. Olsem na i bin gat kros i kamap na ol pablik tok kros i kamap ples kliia we i no luk gut tumas long ai bilong ol opisa insait long CS na ol manmeri nating. Na tupela wik bihain, yumi harim nius bilong ol kalabus i ranawe long Buimo. Na neks wik bai wanem arapela hevi i kamap?

Tude, planti ol haus kalabus i liklik tumas. Populesen bilong ol kalabus i bikpela moa na no gat inap haus bilong putim ol. I gat planti moa lain i wet kot i stap long kalabus. Planti bilong ol haus kalabus i no gat strongpela sekyuriti banis i raunim ol. Dispela i mekim isi tru long ol i kalapim banis na ranawe. Na wanpela bikpela hevi tru em namba bilong ol woda long ol bikpela haus kalabus i sot, i no inap long mak bilong ol kalabus.

Ol dispela hevi i no bilong nau, nogat. I gat panti ripot i save kamap we i askim nesenel gavman long stretim hariap. Planti

taim ol dispela singaut i no inap karim kaikai hariap bikos i no gat mani. Tasol i luk olsem ripot bilong mani i sot em i no trupela as bilong watpo na wok i slek. I luk olsem CS i wok long yusim mani na taim na ol opisa bilong en long strongim wok bilong ol long Mosbi tasol. I no gat bikpela wok tumas i save kamap long ol arapela senta.

Ol i stap olsem long taim bilong kolonial gavman yet.

Olsem na i gutpela sapos gavman i putim yau gut na opim han na givim mani long stetim ol hevi insait long CS. Namba wan wok bilong CS em i bilong lukautim ol kalabus – i mas gat inap woda na ol opisa bilong mekim dispela wok. Putim ol strongpela na longpela sekyuriti banis raunim ol haus kalabus. Katim daun namba bilong ol CS opisa husat i sindaun nating long ol opis long Mosbi na salim ol i go aut long ol provins long mekim wok tru. Ol kot i mas hariap long harim keis bilong ol lain i wet kot na dispela bai sotim namba bilong ol lain insait haus kalabus.

Dispela em sampela tingting tasol mipela i tromoi i go long ol saveman husat i mekim wok painimaut nau long stretim hevi bilong ol haus kalabus long kantri. Save i stap long ol.

Tok kliia long hamas mani skul bai kisim long TFF na DDA long kamapim projek



LAS wik Minista bilong Edukesen Nick Kuman i salim wanpela pas long olgeta skul na skul bod long ol i no ken sasim projek fi.

Na sapos ol skul i kisim projek fi long ol sumatin long stat bilong skul ol i mas givim bek mani bilong ol sumatin.

Dispela em bikos Kuman i tok Gavman bai helpim long givim projek fi, sampela long TFF na sampela long Distrik Developmen Atoriti. Dispela i gutpela nius long ol papamama.

Kuman i tok ol skul i ken kisim mani long tuition fee fri (TFF) mani long kamapim ol projek na moa yet ol i ken aplai long Distrik Developmen Atoriti (DDA) long mani long kamapim projek bilong ol. Dispela i gutpela tok tu.

Tasol hevi nau em ol skul i no kliia hamas mani tru ol i mas yusim long TFF na hamas mani tru em DDA i makim bilong ol skul i aplai

long yusim. Dispela tok i paul na olsem Kuman na Edukesen Dipatmen i mas kliia long dispela. Long pas em i tok em i skelim na givim pinis K49.6 milen, las TFF hap mani bilong las yia em i bin holim i stap. Na bai em brukim na skelim K602 milien mani bilong 2016 i go aut tu. Long dispela, K75 milien em bai mekim long namba wan term. Dispela i gutpela nius tu. Tasol hevi em olsem maski em i tok em givim pinis mani, sampela skul i tok ol i no kisim yet dispela

mani. Na sampela i tok ol i no kisim olgeta mani ol i bin askim long em, bihainim namba bilong ol sumatin ol i gat long em.

Sapos kain tok i kamap, husat tru mipela i mas bilipim?

Edukesen Dipatmen na moa long ol provinsel edukesen opis i mas mekim samting stret olsem ol i putim olgeta TFF mani bilong ol skul i go long akaun bilong ol.

Sapos nogat, planti pikinini i no inap long kisim gutpela save ol i mas kisim long em.

Gavman i tok long givim kwaliti edukesen long ol sumatin na em wok bilong ol gavman opis long lukim wok i kamap stret bihainim polisi bilong Gavman.

Bihain long kamap bilong TFF polisi, planti ol sut toktok i go long ol provinsel edministret na edukesen atoriti.

Ol i tok dispela tupela atoriti i wok long holim pasim TFF mani bilong ol skul.

Dispela long wanem Gavman i tok bihainim askim bilong ol skul em i save salim mani i go long ol provinsel edministresen na edukesen opis long tilim i go long wanwan skul.

Kain olsem wok nau i stap long han bilong dispela tupela opis. Sapos tupela i no mekim wok stret, skul na save ol sumatin bai kisim long em bai bagarap na dispela i ken kamapim bagarap long komyuniti na kantri bilong mipela.

Olsem na singaut nau i go bek long Kuman i mas tok stret long hamas mani ol skul i mas yusim long TFF na hamas mani ol DDA i mas makim long ol mani plen bilong ol long skul bilong hap bilong ol i ken aplai, kisim mani na kamapim wok bilong ol.



Published Weekly, Thursday, for Word Publishing Company, Ltd.
P.O. Box 1982, Boroko, NCD
Papua New Guinea
Telephone: (675) 325 2500
Fax: (675) 325 2579
Email: editorial@wantok.com.pg

Pe bilong wanpela yia
52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Editor
Veronica Hatutasi

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.



Anna Solomon (Pastaim Edita husat i bin kisim Veronica long wok) wantaim Veronica i amamas long taim bilong lonsim buk.

BEHIND THE BLOCKADE *Buk lonsing*

Edita bilong Wantok Niuspepa autim buk



Veronica wantaim Fr. Janusz Skotniczny SVD na Simon Pentanu.



Betty Oala, Komyunikesen Opisa wantaim Komiti bilong Intenesenel Red Kros, na Derek Smith, Papa bilong Tusalita Akitek kampani, na famili pren bilong Hatutasi famili I sindaun wantaim Veronica long sainim ol buk.



Ol meri Siwai i danis long bringim buk i go long Simon Pentanu (ABG) Spika long lonsim. Tyler, Changol i holim kopi bilong buk.

Frieda Sila Kana i raitim

EDITA bilong Wantok Niuspepa, Veronica Hatutasi i autim pinis buk bilong em long bikpela hevi we i bin kamap long ailan Bogenvil sampela yia i go pinis.

Misis Hatutasi i bin lonsim dispela buk wantaim helpim bilong BCL (Bogenvil Kopa Limited) na Rio Tinto long las wik Fraide 26 Februeri long Gren Papua Hotel long Pot Mosbi.

Simon Pentanu, Spika bilong Palamen bilong Bogenvil Rigion Gavman na pastaim Sif Ombudsman, i bin stap long lonsim dispela buk.

Planti lain i bin kamap long witnesim dispela de bilong amamas we Veronica i bin soim olsem dispela buk nau i stap bilong ol manmeri inap long baim na ritim ol stori bilong em yet wantaim ol pikinini na famili bilong em long taim ol i bin stap long hevi long Bogenvil, na long taim we ol pipel i bin painim rot bilong stretim dispela hevi.



Kava bilong buk.

Namel long ol lain husat i bin kamap em Provinsal Tresera bilong o SVD o Sosaiti bilong Divain Word, husat i bin

sponsaim buk projek bilong Veronica, na Siaman bilong Word Publising Kampani, Fr. Janusz Skotniczny, Embeseda

bilong US long PNG, Solomon Ailan na Vanuatu, Catherine Ebert-Gray, Kamapani Seketeri bilong BCL na Kantri Menesa bilong Rio Tinto, Mark Hitchcock na ol wokman, wokmeri bilong BCL/Rio Tinto, Siaman bilong IPBC, Paul Nerau, Tim Bryson, Kaunsela lukautim Bogenvil Des long Australia Hai Komisen, ol famili na wantok bilong Bogenvil, ol wanwok long midia na ol olupela wanwok bilong Word Publising na ol wokman na wokmeri bilong Wantok Niuspepa.

Fr. Janusz Skotniczny i makim ol SVD komyuniti long PNG long tok amamas long Veronica long buk bilong em toktok long dispela buk, em i bin tok olsem i gat tupela stori insait long kamap bilong dispela buk. Namba wan em stori bilong Veronica Hatutasi i raitim buk na namba tu em stori we i no stap long buk tasol em i gat wankain mak tasol olsem long buk.

Na dispela em stori em bilong rot bilong Veronica i pablisim dispela buk.

“Em i stori bilong ‘BLOCKADE’ long pablisim wanpela buk insait long PNG.

Planti rot i pas long we bilong kamapim buk, olsem painim mani na ol opis bilong BCL/Rio Tinto, Siaman bilong IPBC, Paul Nerau, Tim Bryson, Kaunsela lukautim Bogenvil Des long Australia Hai Komisen, ol famili na wantok bilong Bogenvil, ol wanwok long midia na ol olupela wanwok bilong Word Publising na ol wokman na wokmeri bilong Wantok Niuspepa.

“Ating ol PNG raita i mas sanap bung wantaim na kamapim Asosiesen bilong PNG Ota.” Fr. Janusz i tok.

Ol Siwai komyuniti i bin wokim wanpela singsing bilong ol Bogenvil yet wantaim “biriko” na namba wan bubu man bilong Veronica, Tyler Changol wantaim kasen bilong em, Geno Iamo i holim buk long givim Simon Pentanu husat i bin lonsim dispela buk.

Dispela de bilong amamas i pinis wantaim ota bilong buk i sainim ol buk we ol manmeri i baim.

Em wanpela bikpela wok tru we i go pinis long 6 klok apinun.

Nicky Bernard/ Brata Raj SVD



Veronica wantaim Masta ov Seremoni, Frank Kolma.



Veronica wantaim nupela ambasada bilong USA long PNG, Solomon Ailan na Vanuatu, Catherine Ebert-Gray.




Veronica wantaim ol bipo taim wanwok bilong em long Word Publising Kampani.



Veronica wantaim ol wanwok bilong em long Wantok Niuspepa.



Hatutasi famili – Lephon (Trevor Jonath- namba 3 pikinini bilong Veronica, namel em Denise Lima, pikinini meri wantaim namba tu pikinini man bilong em, Carlos, Veronica na George Hatutasi, man bilong Veronica long hansut) wantaim famili bilong ol i amamas long taim bilong lonsim buk.



Paula Nerau, Siaman bilong Kumul Consolidated Holdings (KCHL), em i bin Menezing Dairekta bilong Bogenvil Developmen i sanap wantaim Brata Raj SVD.



Simon Pentanu, ABG Spika wantaim pikinini meri em wantaim buk.

Amamasim nupela klasrum



Ol sumatin bilong St Hohn Aposel na June Velli amamas long nupela klasrum bilong ol. Ol foto: Nicky Bernard

Nicky Bernard i raitim

PLANTI bilong ol pikinini i save amamas taim nupela samting kamap long skul bilong ol. Ol bai mekim kain kain samting long amamasim ol papa mama na ol tisa, na ol manmeri husat kam long skul bilong ol.

Dispela skul em i olpela skul tu insait long NCD na taim ol i opim dispela nupela klasrum planti ol pikinini i bin amamas stret. Dispela tupela skul i kisim wankain nupela klasrum na wankain stail, na wankain mani we memba bilong ol, Michael Malabag i putim.

Ol pikinini long dispela tupela skul i bin amamas tru taim memba bilong ol yet i bin go opim. Na ol pikinini long dispela tupela skul i bin givim sampela presen long memba bilong ol long wanem, ol i save harim nem bilong em tasol. Na taim em i go opim ol klasum bikpela amamas i kisim ol dispela pikinini long dispela tupela skul.

Planti ol pikinini long Mosbi Not Wes bai amamas taim ol nupela klasrum bilong ol bai pinis long dispela yia.

Long las wik ol sumatin bilong tupela skul long Tokarara insait long Nesenel Kapitel Distrik(NCD) i bin amamas long opim nupela klasrum bilong ol.

Long Tunde, St John Aposel Katolik Skul i bin amamas long opim 4-pela klasrum insait long wanpela bilding tasol. Dispela i mekim ol pikinini long dispela skul i amamas long wanem, bai i gat planti spes bilong ol long sindaun gut na lainim.

Wankain tu long June Velli Praimeri skul long sem hap tasol long Tokara.



"Friends"
"Kaibigan"
"Wantoks"



MANILA
k1,708*
RETURN

Call toll free 180 3444 for more information.

Air Niugini
www.airniugini.com.pg

*Ex Port Moresby. Conditions Apply.

Em nau! Ol pikinini i ken painim rot i go long ples wantaim Wantok kru...



- Ol wod lista:*
- | | | |
|----------------|----------------|----------------|
| BELHAT | KOKOMO | MEKNOIS |
| DIS | KRISTEN | PAIAWUT |
| GOD | LONSIM | PATER |
| HEVEN | LOMAN | PITPIT |
| HELT | MAIMAI | RISPEK |
| KATOLIK | MAKMAK | RULA |
| KIRAP | MANDATO | TUPTUP |

E I K T A R O J E Y L S F H E L T Z N V O R N R I
V H M L K B B E L H A T R V E Y L U R R C G K N N
J A U A O O I R M E A I I I E V J G T Y P P J J O
Z R I I K M A L M R S K R I S T E N A H A I E G T
V N E G O M A N D A T O T A U P R N G R T R X A T
O U D L M E A N S I I O J W U T E O I H E D F I E
K V L A O K L K M B M M A M V N N K D I R S G A D
R M G S M N A T B I N I A E G G E S I S D D T T I
Y E I K I O S T U K A L W I A T H X K E L T Y T F
R D C A M I N I O P I T P I T S I A E A S A L A M
E D R D C S B G M L T R H P H Z O P S O L T G O T
J D O Z G E Q L I E I U E A N T J C K I Q U Y Y A
S G Q E B R A Y W S N K P O T O D M S E P U E S I
Y V R E A T T I F R S P L E O Q N O F K O G D T S
I I S A E B G C P G T T S H L N T S I D J P E L A
D T A E R E E P O M M S M S N M X S E B S Y X S O
C G B I E P U Z R T A P I M W U Z G A Y I I H R X
R N I Q T O A E T M V D W W A A X D B D W A A A E
A S S H R E A P S B X H S S D E D W S A U J K I T
S R T P Q R U M J T K O Q T A G A E Y I L W D R W

STORI BILONG TUMBUNA

Masalai ranim man wantaim pikinini boi bilong em

BIPO bipo tru, wanpela man i stap. Em i gat famili-wanpela pikinini man bilong em, meri bilong em na wanpela dok bilong ol.

Long dispela taim, bikpela san taim na olgeta samting i drai, na wara tu i go liklik.

Man i sindaun salim tingting i go na em i tok em i mas go long bus. Man i tokim meri bilong em long go long gaden na digim kaukau inap long tripela de. Long dispela taim, em i tok tripela bai kaikai long bus.

Meri i bihainim tok bilong em na digim kaukau bilong ol. Papa na pikinini boi na dok i kisim bunara, spia, bus naip, tamiok, masis na ol go long bus.

Ol i go insait namel tru klostu long wanpela bikpela maunten na ol i wokim wanpela haus na mekim bikpela paia.

Papa na boi bilong em i slip long bet, dok i slip klostu long dua.

Neks de, olgeta i painim kapul na ol i kilim wanpela na karim kam long nupela haus na kukim kaikai na apinun na san i go daun.

Taim em i tudak, ol i slip na ol harim ol kainkain krai bilong binatang bilong bus, bikpela win, na ol pisin tu i krai long nait na ol frok tu ol i singaut.

Ol i harim ol man i sanap long dua na tok, "Yupela stilim pik bilong mipela"


Dok i ran i go kaikaim ol na kam bek na go inap long tulait. Long hap nait i no tulait yet papa, pikinini na dok i brukim bus na ran, na masalai bihainim ol na ranim ol tu.

Ol i kisim bikpela bagarap na go kamap long ples. Mama na ol haus lain i sore long papa, boi bilong em na dok tu.

Ol i tambu long go long bus na ol i stap olgeta long ples.

Mr. Joachim Kaugla

EM ORAIT



EM NOGUT

Ansa bilong Wod Pilai isu 2163

X Z R O C L C L L R I O O R G K S P E S W D V N R
Y I D T T U F I Z A N O U T V G R E K M I O M P D
E B F T D Q M J Q L T S P I C O Q C O A W A R R N
E G T I Y T C A D A E O S N J C C A E M E E T C A
H R O E H I T X G C E S A G V T P F E I E L O Y A
A A H C P Y P O U L J E E E O I E S L U E W E R C
T C O N E F N S T K A L E N D A U Z E B R C O S I
C R E A E F E L B O Z E U J R B J T S R C M S M E
S X N O M M E A A N J X Q J I I E E N T U A T C E
X O Z E S T A T O N G R O R P L L I S T I A R R E A
S A Z H O S I A E B S J T E M I K E P E T M R F F
Z T M C E E L D O S T N P E A P K A T N F A I I N
L F R E E B D V I E K N E N I H X L U D R D S F
H E K Q P P I F E K Q E A P T M S E D A D E I I E
F P H N O O E Q F O F I C I D H E T O P I S E L
O Z O I P H Z Y F G E N S E C A R B R P F A V H S
X G C D A F F K S T S F O K P X B I H A N I X D
T T P E H E S G E E N S T M A R I T A T W L D I R
A T P X E D N F Y E O M I N I S T A O N O S O L M
H D E A G N M E Y T L M G I O K L D E G T G R J L



TOK PISIN NEWS
from Radio Australia
radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service

6am - 7am 6080; 7240(KHZ)

7pm - 9pm 5995; 6020; 9710; 1280(KHZ)

Solomon Ailan PM i raun long Melanesia



PM bilong Solomon Ailan, Manasseh Sogavare. Foto: Ednal Palmer

Sam Seke i raitim

SIAMAN bilong Melanesian Spearhead Group, Solomon Ailan Praim Minista, Manasseh Sogavare, i raun nau long ol Melanesien kantri long toktok wantaim ol lida bipo long kamap bilong Melanesien Spiahet Grup (MSG) miting long dispela

mun long kantri bilong em.

Em i bin kenmselim wok-abaut i go long Fiji bikos long birua bilong bikpela Saiklon Winston we i kamapim bikpela bagarap long kantri long las wiken.

Mista Sogavare i bin wok-abaut bilong em long namba 16 long las mun long toktok wantaim ol lida bilong ol

MSG memba kantri.

Bihain long Vanuatu, em i bin go long New Caledonia long wikenna bihain long hap, em i sapos long go long Fiji.

Tasol Dairekta bilong Gavman Komyunikesen Yunit, George Herming em i no bin go long Fiji, tasol go bek long Vanuatu na i bin kaM STRET LONG Mosbi, PNG.

PNG i mas gat planti moa Meri Seif Bas

Caroline Tiriman i raitim

OLGETA provins long Papua New Guinea i mas gat ol meri seif bas o bas bilong ol meri yet long lukautim sekuriti bilong ol.

Olgeta provins long Papua New Guinea i mas gat ol meri seif bas o bas bilong ol meri yet long lukautim sekuriti bilong ol.

Dispela em askim bilong meri iigo pas long Not Bogenvil Human rights grup, Helen Hakena bihainim ripot olsem Namba tu Meri Seif Bas i statim sevis bilong en long Pot Mosbi long wik i go pinis.

Dispela bas sevis i save kisim ol meri tasol na ol i save ran namel long ol bikpela rot insait long siti.

Lain bilong United Nations women na Ginigoda Bisnis Development Foundation i bin statim displa sevis wantaim helpim iekam tu long Port Moresby Chamber ov Commerce na Industry, Gavana bilong Nesenel Kapitel Distrik, Powes Parkop.

Mosbi siti i pulap long planti bas tru, na ol dispela



Wanpela yangpela meri bilong Elevala long PNG Sentral Provins. Foto: ABC

bas i save pulap tumas wantaim ol pasindia, tasol planti taim ol mama, na ol yangpela meri i save bungim hevi long ol man husat i save stilim ol beg bilong ol, o li save mekim pasin nogut long ol meri.

Olsem na UN Women long Papua New Guinea i bin wokbung wantaim ol dispela lain olsem Port

Moresby Chamber ov Commerce na Industry, Price Waterhouse Coopers, na Gavana Parkop long statim dispela sevis blong ol meri.

Benjamin Turi, Metropolitan polis komanda long NCD i tok em i wanbel long dispela sevis na em i tok tu olsem NCD gavman i mas larim planti moa bas olsem bilong ol meri.

Bogenvil Maining Loa i no helpim pipel



OI PNG singsing grup bilong hailans rijon. Foto: ABC

Caroline Tiriman i raitim

WANPELA save meri bilong Bogenvil i mekim bikpela askim i go long Atonomas Bogenvil Gavman (ABG) long tokim gut ol pipel long ol maining loa em ol i bin kamapim long 2015.

Wanpela save meri bilong Bogenvil i mekim bikpela askim i go long ABG long tokim gut ol pipel long ol maining loa em ol i bin kamapim long 2015.

Dokta Ruth Spriggs, wanpela meri bilong Bogenvil yet husat i save lukluk long ol wok kamap na sindaun blong ol pipel bilong Bougenvil i mekim dispela askim long wanem, em i tok dispela maining loa i helpim tasol ABG na ol maining kampani.

Em i tok dispela loa bai nap kamapim narapela bikpela hevi olsem Bogenvil kraisis em planti tausen pipel i bin dai long en.

Bikpela pait i bin kamap long Bogenvil long ol yia 1980's long wanem ol papa graun klostu long Panguna Kopa Main i bin gat kros wantaim Main na PNG Gavman.

Dokta Spriggs i tok, emi wari long wanem aninit long ol loa, gavman inap sasim ol papa graun samting olsem K20 tausen kina na kalabus inap long wanpela yia sapos oli brukim ol dispela maining loa.

Goroka So i bungim wari

Caroline Tiriman i raitim

I LUK olsem olupela kalsa so long Papua New Guinea em "Goroka Show" bai no nap go het long dispela yia long wanem National Sports Institute i tok ol i no nap yusim graun bilong en.

Goroka Show em i wanpela bikpela so we i save pulim planti turis i kam long

planti kantri long wol long lukim ol pasin tumbuna, ol singsing na tu ol samting em pipel i save mekim.

National Sports Institute i tok lain bilong FIFA under-20 Women's nesenel tim i iiwok long yusim graun long training long FIFA andar 20 Wol Kap long mun Novemba.

Siameri bilong Goroka Show Keryn Hargreaves i tok,

em i wari tru long dispela tok-tok bilong Institute long wanem, dispela yia bai makim 60 yia blong so na o li wok long redi gut long seelbretim so long mun Septemba.

Mis Hargreaves i tok planti handret pipel i save stap long dispela so, taim namba bilong FIFA anda-20 Women's nesenel tim i stap aninit long 20.

PNG ren i kamapim hangere yet

Caroline Tiriman i raitim

OL pipel long Papua New Guinea i amamas long lukim ren i kamap bihainim draut o taim bilong bikpela san t, tasol ren i kamapim tu ol taitwara em i rausim na bagarapim ol gaden kaikai na ol rot.

PNG, wankain olsem Solomon Ailan na Vanuatu i bin kisim hevi long draut em

El Nino ibin kamapim long 2015.

Plantu hap long PNG nau i wok long lukim ol bikpela ren, na ol pipel i amamas long mekim ol gaden em o li bin bagarap long draut, ol pipel i sot yet long kaikai long wanem, ol wara i tait na rausim ol gaden.

National Weather Sevis long PNG i askim Gavman long redim kantri long ol

bikpela taim nogut em dispela kain taim o wedar em oli kolim La Nina bai kamapim long dispela yia.

El Nino em i save bringim ol bikpela san o no gat ren i save pundaun, taim La Nina i save bringim planti ren tru.

Maria Linibi emi go pas long PNG Women in Agriculture na emi tokim Radio Australia olsem taitwara i mekim ol pipel i hangere yet.

Clinton i mekim Trump i wari long South Carolina



Hillary Clinton i givim toktok bihain long bikpela sapot long South Carolina.

BIKPELA sapot tru long Saut Carolina i go long Domokretik kendidet, Hillary Clinton husat i tokim ol sapota bilong em, "kempein bilong em i go nesanel tumora." that her "campaign goes national" starting "Bai yumi resis long olgeta vot insait long olgeta stet. Yumi no kisim samting o kisim ol man nating nating," Clinton i tokim ol man long Columbia, saut Carolina, husat i amamas na soim bikpela sapot long en.

Hilary Clinton i kisim 73 pesen long ol vot taim Bernie Sanders' i kisim 26 pesen. Ol ileksen ripot i tok Clinton i winim bikpela mak long ol vot, 82 pesen i kam long ol blekpela manmeri. Em i winim mak we Barrack Obama i bin kisim long 2008 ileksen. "Tude, yupela i salim mesej long stet. Taim yumi sanap wantaim, i nbo gsat banis we yumi no inap brukim," pastaim seketeri bilong stet i bin tok.



Bill Clinton sapatim meri bilong em

Pastaim Presiden Bill Clinton bilong Amerika i toktok taim ol i stop long kempein long saut Florida, makim meri bilong em, Hilary Clinton long Betty T. Ferguson Rekriesenel Kompleks long long Miami Gardens, Florida.

Bill Clinton i edresim hevi wantaim ol tupela protesta bilong Benghazi long wanpela reli o bung. Taim presiden i toktok, ol manmeri i wokim planti nois tumas Long South Carolina Democratic Praimeri. Taim ol i tokim ol manmeri i lusim pasin bilong singaut na toktok bikpela, ol i no harim tok, na presiden i tok maski, larim ol..

Presiden Clinton i save long etresim ol lain i mekim planti nois na singaut. Long laspela kempein em i holim long Saut Carolina, wanpela sapota bilong Donald trump i bin tok em (Presiden) i bin kisim mani bilong Trump: "Tru, mi kisim bilong Trump na yusim gut long faundesen bilong mi, moa gutpela winim rot em i yusim long en nau."

Praivesi bilong Apple i bikpela samting

CEO bilong Apple, Tim Cook i tok sefti na sekyuriti bilong pipel i bikpela samting na olsem, ol i no wokim hatwe long iPhone long sait bilong data. Dispela i bihainim askim we FBI i putim

long ol long helpim wantaim data long iPhone bilong Syed Farook, we em na meri bilong em, Tashfeen Malik, i bin kilim dai 14 -pela na kamapim bikpela bagarap long 22 pipel long wanpela holidie pati long las Desemba.

Em yia bilong Leonardo DiCaprio long winim Oscar awot

I LUK olsem muvi ekta, Leonardo DiCaprio, bai kisim Oscar Awot bihin long 6-pela nominesen em i bin kisim insait long 6-pela yia nau.

Oscar awod em top awod ol muvi ekta long Hollywood i save kisim long gutpela wok ekta long ol muvi.

DiCaprio nau i gat 41 kris-mas, tasol em i bin kisim namba wan nominesen taim em i yangpela yet wantaim 22 krismas long muvi, "What's Eating Gilbert Grape." Long stat bilong dispela yia, DiCaprio i bin kisim nominesen olsem produsa long long muvi, The Wolf of Wall Street" na planti i bilip olsem em bai winim dispela Oscar awod.

DiCaprio i bin ektim pat long stori i kamap long 1820 long wanpela bea hanta na em i no isipela samting em i bin mekim long ekt long dispela muvi olsem bea i atekim em long taim aisren i pundaun, sindaun long 5-pela wa long ol i wokim ol mekap, kaikai i no kuk liva bilong wail kau na groim na stap wantaim maugras long wan na hap yia. No gat ekta i wokim dispela kain pastaim long en.

DiCaprio i kisim pinis sampela muvi awot olsem Golden Globe, Screen Actors Guild na AFTA awot na nau em i wetim tasol bikpela wan, em Oscar awot.



Leonardo DiCaprio

'What's Eating Gilbert Grape'

Long 1994, DiCaprio i bin kisim namba wan Oscar nominesen taim em i gat 22 krismas long gutpela ekting long "What's Eating Gilbert Grape." Olsem yangpela disebel brata bilong Johnny Depp, em i bin kisim bes sapatim ekta tasol.

'The Aviator'

Taim em i bin kisim namba tu nominesen long 2005 long ekt long biknem mmuvi, Titanic", na ol arapela olsem "Catch Me If You Can" na "Gangs of New York." Tasol narapela ekta, Ray Charles i bin ekt long muvi "Ray i bin kisim Oscar awot.

'Blood Diamond'

Tupela yia bihain, DiCaprio i bin kisim gen nominesen we em i bin ekt olsem wanpela daimon smagla o hait na kisim daimoin i go aut. Long muvi, 'Blood Diamond', tasol narapela ekta i kisim.

'The Wolf of Wall Street'

Planti i bin ting olsem DiCaprio i wokim gut na bai kisim Oscar long ekt olsem stokbroka muvi, "The Wolf of Wall Street." Tasol olsem long dispela yia, em i bin kisim Golden Globe awot long musik komedi muvi, tasol Matthew McConaughey, i bin winim top awot.

Hat operesen mekim liklik bebi i kamap orait



Papamama bilong Lincoln Seay i tok em bin luk olsem bai em i dai bipo long hat trensplen.

Bebi i kisim Infant laip seving hat trenspeloen o narapela hat

Wanpela famili bilong Seattle, Amerika i tok i bin luk olsem ol bai lusim liklik bebi bilong ol i gat 7-pela mun tasol bihain long operesen we i kisim planti awa i kam gut, em i luk gutpela, stap laip na mipela i amamas,

papamama Rob na Mindy Seay i tok.

Liklik bebi Lincoln i bin bon wantaim hevi long lewa bilong em, tasol wantaim nupela lewa em i kisim long operesen, em i pilim strong na i wok long pilai pilai i stap. Papamama bilong em i ammas na tok i no long taim ol bai kisim bebi i go long ples.

Gavman mas helpim bisnis



Don Polye

GAVMAN i mas sapotim na helpim ol bisnis na kampani bi-long PNG long mekim bisnis, **Oposisen Lida Don Polye** i tok.

Mista Polye i tok kantri i nidim mani o ol foren risev na dispela i wok long mekim ol bisnis haus na kampani i sot long mani long baim ol samting ol i save kisim i kam insait long ovasis.

Mista Polye i tok gavman i mas sapotim invesmen na helpim ol kampani long ranim bisnis gut.

Em i mekim dispela toktok las wik bihain long em i harim olsem gavman i wok long kontrolim ol foren risev long go aut long kantri.

Gavana bilong Sentral Benk, Loi Bakani, i bin tok Sentral Benk i wok long kontrolim ol mani bilong Amerika o ol i kolim US Dola.

Foren o foren risev em i toktok long ol risev Amerikan Dola mani PNG i gat. Ol kampani na bisnis haus i sot long US Dola long baim ol samting we PNG i no save mekim long hia.

Long baim ol dispela samting ol i mas gat US Dola. Ol i no save baim long mani bilong yumi yet o PNG Kina.

"Gutpela gavman i kontrolim autflo bilong foren risev tasol ol i no ken stopim ol bisnis long baim ol samting i kam insait," Mista Polye i tok.

Em i tok gavman i mas kamapim wanpela rot long larim ol kampani na bisnis haus i mekim bisnis yet.

Ok Tedi Main i op pinis



CEO bilong OTML, Peter Graham, i sekan wantaim ol wok manmeri bilong kampani husat i nau redi long wok gen bihain long main i bin pas long 7-pela mun olgeta.

BIKPELA kopa main bilong kantri, Ok Tedi Main, i op gen long Tunde dispela wik bihain long drai weda i bin mekim main ya long pas long mun Ogas las yia.

Ol wok opresen bilong main i op gen long namba wan de bilong mun Mas dis-

pela yia. Dispela i bihainim toktok bilong bod na menesmen bilong Ok Tedi Maining Limited (OTML) wantaim gavman.

Mineral Risos Atoriti (MRA) i bin givim tok orait aninit long stetutori sefti apruval long larim main i op gen.

Bikpela komesal senta kirap namel long Madang taun



Wok i go het yet long bikpela komesal senta namel long Madang taun em Steamships Properties i go pas long en.

James G. Kila i raitim

MADANG taun i wok long kisim nem nogut long ol raskol na bikhet pasin long provins, na tu rot insait long taun i bagarap stret long sampela seksen.

Tasol long gutpela sait tu em Madang taun i wok long lukim sampela gutpela divelopmen i kirap.

Nau yet wok i go het yet long wokim kamap wanpela bikpela komesal senta namel long taun. Dispela bikpela divelopmen em bikpela haus we bai i gat ol lain i rentim na putim stua na ol arapela bisnis insait long dispela komesal senta.

Steamships Properties i go pas long dispela nupela komesal senta divelopmen namel long Madang taun, we bai senisim tru lukluk bilong senta bilong bisnis na komesal senta bilong taun.

Narapela nupela divelopmen long Madang taun em Agmark Didiman Hadwea i muv i go long olpela sip bris na ofis bilong Lutheran Shipping.

Agmark Didiman i rentim dispela eria long wokim bisnis bilong en long Lutheran



Agmark Didiman i muv i go long olpela sip bris na opis eria pastaim Lutheran Shipping i save stap long en. Ol foto: James G. Kila

Shipping, o lain i lukuitim.

Presiden bilong Madang Semba ov Komes na Indastri, Kevin Murray i tok planti bikpela ol bisnis long arapela provins i soim intares go wokim bisnis Madang.

Mista Murray i tok planti ol bisnis i tokaut long em olsem ol i gat bilip olsem Madang i gat moa sans long gro na moa bisnis bai kirap bikos i gat tupela bikpela maining projek long provins em long Yandera Projek na Ramu Nikel Projek.

Antap long en tu wok divelopmen long kirapim Pasifik Marin Industrial Zon (PMIZ) bai kamap, na dispela bai pulim moa bisnis na divelopmen long Madang provins.

Gavana bilong Madang, Jim Kas, i tok PMIZ bai kamapim moa bisnis na divelopmen we bai lukim ekonomi bilong Madang i senis taim em i go insait long operesen stret.

Mista Kas i tokaut tu olsem bai i gat foa-pela lein rot stat long Vidar we PMIZ

projek i stap long en igo long Madang taun.

Em i tok Madang taun i gat nupela bikpela maket we bai helpim ol rurel pipel igo salim samting.

Dispela maket em gavman bilong Japan aninit long Japan Intanesenel Koporesen Ejensi (JICA) i putim mani wantaim sapot bilong PNG Nesenel Fisheris Atoriti (NFA) long mani mak olsem K26 milien.

Dispela maket projek bai klostu pinis na bikpela launching seremoni bai kamap.

"Mipela i amamas long tok welkam bek long ol wok manmeri bilong OTML long statim gen oprese4n bilong main," Sif Eksekutiv Opisa (CEO) bilong OTML, Peter Graham, i tok.

Mista Graham i tok nau yet 800 wok manmeri i kambek pinis na stap long main sait na dispela namba bai i go antap long namel bilong dispela mun.

"Mipela i lukluk long larim mipela i kirapim gen main wantaim ol sefti samting. Ol wok manmeri husat i kam bek gen long wok bai mekim sefti indaksen long main sait na bihain long dis-

pela ol bai mekim ol arapela sefti indaksen long sait bilong wan wzan wok ol i save mekim. Dispela em i namba wan samting long sefti sait na long gutpela bilong ol wok manmeri na kampani wantaim," Mista Graham i tok.

Ol main inspekta bilong MRA i bin kam lukluk raun long Tabubil long Febueri 22-26. Long dispela raun bilong ol, ol i bin lukluk raun na sekim Main, Mil, Bige, na Kiunga Sip bris long sekim gut ol sefti samting long kirapim gen main.

Ol i bin lukim ol samting na amamas long wok bilong

OTML menesmen na wok manmeri husat i wok aninit long Kea Mentenens na Sekyuriti (CMS) taim drai weda na pundaun bilong level bilong Flai Riva i bin fosim main long pas.

Ful Prodaksen bai kamap long pinis bilong dispela mun bihain long ol wok manmeri i putim nupela SAG2 sel.

OTML i bin pasim main long mun Mas las yia na i bin daunim namba bilong ol wok manmeri. Planti ol wok manmeri husat i save slip long haus bilong kampani long Tabubil na Kiunga i bin lusim haus bikos OTML i

salim ol dispela haus long ol papagraun na kampani bilong ol papagraun.

Bihain long 7-pela mun, gavman wantaim bod na menesmen bilong OTML i wanbel long opim gen dispela bikpela kopa main bilong kantri bihain long wara level bilong Flai Riva i orait gen.

Maski prais bilong ol metal olsem kopa i pundaun long intanesenel maket tasol Mista Graham i bin tok Ok Tedi Main i gat bikpela sans long mekim winmani.

Gavman bilong PNG em i papa bilong OK Tedi Main.

Nupela Madang taun maket bai op klostu taim

James G. Kila i raitim

OL RUREL mama long Madang provins bai i gat naispela ples long go sindaun na salim ol fres kaikai taim nupela Madang taun maket i op klostu taim.

Wok long nupela Madang taun maket klostu bai pinis na long las wik tasol, ol wokman i rausim kapa banis i raunim wok kamap insait long maket na planti pablik manmeri long Madang i amamas tru olsem insait eria bilong maket em i gutpela tru na luk stail stret.

Madang Fisheris edvaisa Berom Angurru i tok olsem dispela nupela maket gavman bilong Japan aninit Japan Intanesenel Koporesen Ejensi (JICA) wantaim Nesenel Fisheris Atoriti i sapotim. Kos bilong dispela nupela maket em moa long K26 milien.

Mista Angurru i tok dispela nupela maket i gat 6-pela bilding wantaim nupela stail kain toilet, ples bilong bungim

pipia na tu i gat ol opis eria. Wanpela seksen bilong maket tu i stap arere long solwara we rot i katim long namel. Dispela seksen bilong maket bai i gat frisa long wokim ais long sevim ol pisaman o lain husat i kisim pis long solwara.

Mista Angurru i tok olsem dispela nupela Madang taun maket em i naispela tru na winim ol arapela maket long PNG.

Em i tok dispela nupela Madang taun maket bringim moa long K2 milien long Madang provinsal na Madang Eben Lokal Level Gavman olgeta yia long geit taking taim ol pipel i go salim kaikai na peim get takings.

Maket ya bai helpim gut ol lain bilong salim prespik bikos bai i gat ples bilong wokim ais blok na sevim ol lain long mekim pis na ol kaikai bilong solwara i stap pres longpela taim.

Mista Angurru i tokaut tu olsem ol lain insait long bod em



Nupela Madang taun maket i luk stail stret na bai op klostu taim. Foto: James G. Kila

siaman em provinsal edministreta bilong Madang, Madang Fisheris edvaisa, Madang Sembov Komes presiden Kevin Murray, Madang taun meya Joe

Yama na lain makim koporet Sosaiti, wimen na lain bilong yusim maket.

Em i tok ol menesmen bilong maket bai ripot i go long

bod long lukim operesen ripot i go long JICA PNG opis.

Mista Angurru i tok olsem gavman bilong Japan insait long wanpela agrimen wan-

taim NFA i givim mani long wokim dispela nupela maket na ol i laikim olsem i mas gat gutpela menesmen i stap long ronim dispel maket.



Jayapura em i wanpela bikpela siti long Indonesia na em i klostu tru long PNG.

PNG Air lukluk long Jayapura

PNG Air i lukluk long kamapim dairekt flait long Mt Hagen na Jayapura long Papua Provins bilong Indonesia.

CEO bilong PNG Air, Muralee Siva i tok dispela plen bilong PNG Air long kamapim dairekt falit namel long Mt Hagen na Jayapura i ken kamap gut tasol igat planti ol wok ol opisal bilong balus kampani na tupela gavman bilong Indonesia na PNG i ken mekim.

Mista Siva i tok ol manmeri long hailans rijon bai kisim bikpela benefit sapos dispela sevis i kamap.


"Sapos PNG Air i opim dispela nupela rot, planti ol manmeri long Hailans rijon bai

kisim bikpela benefit taim ol i flai i go long Jayapura na mekim soping, kirapim nupela bisnis, na go raun long holide,"Mista Siva i tok.

Em i tok ol manmeri bai no inap westim taim na mani gen long kam long Pot Mosbi na kisim balus gen long Go long Jayapura tasol ol bai stap long Hailans yet na go long dispela siti bilong Indonesia.

"Dispela plen sapos em i kamap, em bai bringim planti gutpela samting long PNG Air na ol manmeri long Hailans,"Mista Siva i tok.

Em i tok ol manmeri PNG i ken kisim balus o sip i go long ol narapela ailan na siti bilong Indonesia taim ol i kampa long Jayapura.



Toktok moa long laik bilong yu yet wantaim bmobile-vodafone

PRAIS bilong toktok long mobail pon em i go antap bikos kantri i wok long bungim bikpela hevi bilong ikonomi na mani i sot.

Dispela i no stopim mobail komyunikesen kampani bilong PNG yet, bmobile-vodafone long daunim prais bilong yusim mobail pon na kolim ol manmeri.

Ol kastoma bilong bmobile-vodafone nau i ken yusim dispela na mekim pon kol long laik bilong ol yet.

"Vodafone i save putim ol kastoma i go pas. Na dispela wankain pasin bilong Vodafone i nau kam insait pinis long PNG.

Sif Maketing Opis (CMO) bilong bmobile-vodafone, Parag Panjwani, i tok bmobile-vodafone i wok long kamapim

wanpela nupela promosen we ol kastoma i ken baim ol bandol.

Dispela ol bandol i kam long mak bilong wanpela wik, tupela wik o fopela wik. Sapos wanpela kastoma i kisim dispela bandol, ol bai no inap wari long baim nupela top kad. Ol i ken yusim dispela bandol long mekim ol kol na teks, Mista Panjwani i tok

Antap long dispela, em i tok ol kastoma bai kisim sampela moa sans long mekim kol o teks long PNG yet.

Long kisim moa toksave, ol kastoma i kem dailim *777# na presim send long painim moa toktok long dispela. Ol i ken sekim long www.bmobile.com.pg/unlimited o kolim 76003555 long kisim moa toksave.

Namba wan tim long Australia i kisim spot awod



Bailey Mes i pait wantaim Laura Geitz long kamap namba wan tim.

DIAMOND em i namba wan netbal tim long Australia, husat i kisim spot awod long stail pilai bilong ol.

Diamonds i winim tupela tim bilong Yia Gongs na kisim AIS Spot Pe-fomens Awod.

Sharni Layton, husat i pilaia bilong tim, i tok klia olsem, "Ol i win bikos ol i laik kamap namba wan tim long dispela netbal resis na ol i save pilai strong."

"Mipela i save tingting long karim nem bilong Australia na mipela bai pilai strong long sampela bikpela gem taim yumi pilai i het," Layton i tok.

"Ol bai pilai long AFL Sempion long dispela yia, na sapos ol i winim narapela moa plak, em ol bai kamap namba wan tim olgeta," Kosa, Alastair Clarkson, i tok.

Scott i winim Honda Klasik



Adam Scott i draiv long Pam Nambis.

NAMBA WAN taim bilong Adam Scott long winim PGA Tour na daunim Honda Klasik long Pam Nambis long suting resis.

Wol namba 13, Scott, i rausim birua pilaia bilong em long Spen-ish fainel raun na winim dispela resis.

Scott i amamas long win bilong em taim em i soim olsem em i namba wan pilaia bikos salens bilong birua pilaia bilong em, Sergio Garcia, i no strong tumas.

Tupela poro pilaia bilong Scott, John Senden na Stuart Appleby, i pilai gut tu long dispela resis we tupela i daunim birua pilaia bilong ol tu.

Yunaitet i daunim ol Arsenal



Harry Kane na Danny Rose i amamas long tupela i kamap wina egensim ol Swansea. Ol foto: ABC

TOTTENHAM Hotspur i no bin kamap sempion bilong ol Inglis inap long em i bin winim dabol long 1961 i mekim em long daunim ol Arsenal.

Bihain long Spurs i daunim ol Swansea City 2-1, ol sapota bilong White Hart Lane i lukim olsem Manchester Yunaitet i daunim ol Arsenal bikos pulbek bilong ol, Danny Rose, i kisim wanpela poin gen.

Leicester bilong Claudio Ranieri i kisim 56 poin long 27 resis na Spurs i kisim 54 na Arsenal i kisim 51.

Manchester Siti i kisim namba 4 ples wantaim 47 poin na i gat wanpela gem i stap yet long pilai.

"Mipela i bilip olsem mipela i ken winim olgeta gem na mipela bai lukim wanem samting bai kamap long pinis bilong dispela

sisen. Mipela i tingting long resis long ol gem i stap yet na mipela bai pilai olsem i go," Menesa bilong Tottenham, Mauricio Pochettino, i tok.

"Long mi yet, em i no bikpela samting long Arsenal i lus. Bikpela samting em kala bilong pilai bilong mipela na i gat 11-pela premia lig gem i stap yet long mipela bai resis."

NRL pilai bilong Mitchell Pearce bai stop ...edvaisa bilong ol meri i tok

EDVAISA bilong ol meri long gem, Catherine Lumby, i tok Nesenel Rgabi Lig (NRL) bai stopim pilai bilong Mitchell Pearce.

Hap-bek bilong Sydney Roosters, Pearce, i tok sori olsem em i asua long wanem samting em i bin mekim long wanpela meri taim meri i tok nogat.

"Mi asua pinis na mi go stap wanpela wik long Thai na nau mi bai bihainim wankain panismen klap o NRL bai givim long mi,"

Pearce i tok.

"Em ol bai tokim em long kisim malolo insait long 6-pela wik na \$50,000 long baim fain, tasol em i wankain olsem em i paitim long fes bilong em yet," Lumby i tok.

"Mi bai no inap long larim em long pilai gen bikos em i save kisim olgeta sapot na skul toktok na tru em i wanpela senia lida we em i ken save gut long ol asua na stretpela pasin."

Nu Saut Wels Oriji kepten bilong

Pearce, Paul Gallen, i tok dispela kain eksen em i no gutpela pasin.

"Em i helpim em yet na nau em i ken malolo long 6, 8, o 10-pela wik pastaim na bihain em i ken kam bek long gem," Gallen i tok.

Nupela Sif Eksekutiv bilong Roosters, John Lees, i tok, "Em i no vailens o wanpela bikpela kraitim olsem raskol pasin i kamap, nogat. Tasol em i toktok bilong so-saiti we mipela i tok nogat olsem na mipela i toktok long dispela."

Boksa Dib i go bek long ring

SYDNEY boksa, Billy Dib, i go bek long boksen ring bihain long meri bilong em, Sara Selim, i dai long sik kensa long mun Septemba, las yia.

Dib i no bin stap insait long boksen ring inap long 9-pela mun na nau em i go bek long pait.

Em i go insait long boksen ring long Emporium Fangsen Senta long Sydney we planti manmeri na pikinini i pulap long en, na em i tok olsem, "Em i gat bikpela amamas winim pait, mi bai no inap long lus gen."

Kosa bilong Dib, Billy Hussein, i tok olsem Dib i pait gut taim pait i stat, tasol em i kisim wanpela pans bihain.

"Em i bin pait strong na mipela i krai olsem mipela i brada tru bilong em," Hussein i tok.

Dib i winim dispela pait wantaim bikpela amamas.





Ramu NiCo helpim helt tim long stopim sik disentri



Ramu NiCo medikol opisa givim sut long liklik pikinini.

KWIK-TAIM helpim na gutpela toksave na sapot bilong ol wokman bilong Ramu NiCo Menesmen (MCC) Ltd long Basamuk i bin helpim long stopim bikpela sik disentri o sik pekpek wara long go bikpela long Tugyak wiles long Raikos distrik long las mun (Februari).

Dispela sik disentri long stat long mun Februari i bin kilim indai tripela lain long ples Tugyak, wanpela pikinini, wanpela yangpela na wanpela lapun.

Dispela sik disentri i bin kamapim hevi na pret long Tugyak komyniti we i stap 2 kilomita longwe long Basamuk Rifaineri bilong Ramu NiCo.

Bihain long ol wokman bilong Ramu NiCo Komyuniti Afes Dipatmen na HSE i kisim ripot olsem sik i kamapim dai na hevi long Tugyak, ol i kamapim wanpela miting we Vais Presiden Xu Jian na Deputi Jeneral Menesa Operesins bilong BSK Rifaineri, Bill Hill i go pas long en.

Long miting ol i kamapim wok plen we i lukim ol CA na HSE opisa i go aut na redim ol helpim wantaim marasin long givim pastaim long ol Madang Provinsal Helt opisa i go.

Ol Ramu NiCo CA na HSE

opisa i wok hat stret long sait long kisim ol ripot na tu kisim nem na krismas bilong ol lain na tu namba bilong ol lain i sik na tu karimaut wok painimaut long wara na ples ol i save kisim wara na ol arapela infomesen.

Ol lain CA na HSE long Basamuk i salim toksave i go long Madang bihain na i redim wokabaut bilong ol lain bilong Madang Provinsal Helt opis long go long Basamuk. Ol lain bilong Madang Provinsal Helt Opis husat i bin go long Basamuk em Provinsal Envairomental Helt Opisa, Lawrence Gigi, Roy Miling na Luke Botty. Ol i bin go long las wik Februari 27 long mekim wok painimaut.

Mista Gigi i tokaut olsem insait long wok painimaut ol i luksave olsem i gat ol sain na mak bilong sik disentri i stap bikos ol i lukim ol pipel i gat hetpen, bel-pen, skin hat, trauf, pekpek wara, pekpek wara wantaim blut na skin les na wik nating.

"Bihain long ol wok painimaut bilong mipela long Tugyak eria, mipela i ken tokaut stret olsem dispela em sik dpisentri," Mista Gigi i tok.

Ol lain Helt Tim bilong Madang wantaim sapot bilong

Ramu NiCo CA na HSE tim i bin raun na givim marasin long ol manmeri na pikinini na tu i bin go lukim ol ples we ol pipel i save kisim wara long dring na kukim kaikai na i givim skul toktok long ol.

Ol lain long Madang provinsal helt i givim toksave tu long Ramu NiCo medikol tim long go het long sekim na putim was long wanem ripot i kam bihain sapos i gat sampela lain i bungim sik ya gen.

Ol lain bilong Madang Provinsal Helt opis i bin raun i go tu long Ganglau helt klinik long sekim ol samting long hap na givim toktok long gavman wok lain long hap long rekot bilong ol lain husat i save kisim marasin na helpim long dispela eid pot.

Mista Gigi i givim bikpela tok amamas long Ramu NiCo imejensi tim bilong CA na HSE Dipatmen long Basamuk long gutpela wok ol i wokim hariap stret long go insait long ples Tugyak long helpim ol pipel.

"Mi ken tok yupela i wokim gutpela wok tru long helpim long daunim dispela wok nogut disentri long go bikpela," Mista Gigi i tok.




Wanpela bikman tu kisim sut long Tugyak.



Ol Madang Provinsal Helt tim wantaim Ramu NiCo imejensi tim.



Helt aweanes kamap long ples Tugyak.



Trukai fan ran bai kamap klostu taim

...planti lain bai amamas na wokabaut wantaim

Philemon Tame i raitim

PAPUA Niugini Olimpik Komiti (PNGOC) bai go pas long Trukai Fan Ran klostu taim we planti lain bai amamas na wokabaut wantaim.

Wokabaut bai kamap long dispela yia long olgeta hap long kantri long mun Jun. Olgeta provins bai bung na wokabaut wantaim i minim olsem planti lain bai joinim Fan Ran na sapotim PNGOC long mekim fanresing bilong Tim PNG.

Presiden bilong PNGOC, Sir John Dawnincura, na Nesenel Maketing Menesa bilong Trukai, Mis Maybellyn Fernandes, i bin lonsim dispela ran long las wik Fonde, Febueri 25, long Pot Mosbi.

Sir John i tok, ol mani bai kamap long Trukai Fan Ran bai helpim PNGOC long bikpela rot long salim Tim PNG long i go resis long Olimpik Gems bai kamap long Rio de Janeiro, Brazil.

"Gutpela kala bilong ol etlit bilong PNG i ken soim namba wan pasin bilong ol long sapot we Trukai Industries

na ol narapela patna na spona bilong PNGOC i redim aninit long Trukai Fan Ran na Kopret Gof Salens bilong Praiminista bai kamap long Me na Jun," Sir John i tok.

"Trukai Fan Ran bai bungim olgeta lain long wokabaut long gutpela envairomen na promotim gutpela helt na namba wan laipstail.

"Fan Ran bilong dispela yia bai kamap long 26 Jun wantaim moa long 50,000 pipel bai wokabaut long ol strit bilong dispela kantri.

Sef De Misin bilong Tim PNG long Rio Olimpik Gems, Emma Waiwai, i tok, "Namba bilong Fan Ran wokabaut i go antap long las yia bikos, Pasifik Gems i bin kamap long Pot Mosbi, na nau mipela i strongim ol pipel long go het na soim wankain sapot long Tim PNG."

"Baim wanpela Trukai Fan Ran t-siot na joinim mipela long na soim sapot bilong yu long Tim PNG."

Fernandes i tok, "Trukai Industries i amamas long go pas long yia Fan Ran gen long dispela yia olsem mipela i redi pinis."

"Mipela i spona long 100,000 siojen olsem kontribusen bilong Trukai long fanresing wokabaut.

"Mipela i no painimaut namba bilong ol provins we Fan Ran bai kamap, tasol mipela i bilip strong olsem namba bilong provins bai abrusim 16-pela provins long las yia na bai go antap long dispela yia. Ol Provins husat i wokabaut wantaim long las yia em Lae, Goroka, Kavieng, Ramu, Popondetta, Mt. Hagen, Tabubil, Kiunga, Alotau, Wewak, Arowa, Buka, Madang Jiwaka na Kokopo."

Dispela em i namba 34 yia bilong Trukai Fan Ran na 17 yia bilong patnasip namel long Trukai Industries na PNGOC.

Cancer Faundesen (CF) i join tu olsem patna long dispela yia na Petron bilong CF, Lynda Babao O'Neill, i stap long lonsing bilong 2016 Trukai Fan Ran. Lynda O'Neill i tokaut olsem Fan Ran sio bai gat print bilong CF wantaim stronpela mesej 'Lukautim Famili bilong Yupela long Kensa. Kaikai ol Gut-pel Kaikai na Eksesais olgeta Taim'.



Nupela Sef De Misin bilong Tim PNG long Rio Olimpik Gems, Emma Waiwai, i toktok long taim bilong lonsim Trukai Fan Ran long Febueri 25.



Namba wan swima bilong PNG, Ryan Pini, i toktok long taim ol i losim Trukai Fan Ran. Ol foto: Philemon Tame

Piksa i soim ol pikinini na mama i werim Trukai Fan Ran Siot. Presiden bilong PNGOC, Sir John Dawnincura, i sanap long han kais, Namba wan swima bilong PNG, Ryan Pini, i sanap long namel na Petron bilong Cancer Faundesen, Lynda Babao O'Neill, i sanap long han sut. Na tu, namba wan weitlifita long Pasifik Gems, Linda Paulsen, i sanap long rait han bilong Lynda O'Neill. Paulsen i bin karim plak bilong PNG long taim bilong opim Pasifik Gems long las yia, 2015.



OFC Jas Pilai program i bung

OL projek menesa bilong Osenia Futbol Konfederesen Jas Pilai program i bin bung long Oklan, Nu Silan, long las wik.

Dispela program em i bilong divelopim skil ol tim memba insait long kantri.

Kodineta bilong OFC Monitoring na Ivaluesen, Supriya Kulkani, i go pas long trening bilong dispela program, long ol manmeri husat i trening i ken kisim gutpela save.

"Em i namba wan program na dua i op long ol lain husat i tingting long joinim dispela program."

"Insait long woksop bilong dispela wik, mipela i lukluk long lain husat i redi na inap long lainim ol nupela skul toktok," Kulkani i tok.

Em i tok moa olsem, Jas Pilai em i spot divelopmen program we Australia Eid, Nu Silan Eid, FFA, UEFA Faundesen bilong Pikinini na UNICEF.

Ol lain husat i stap insait long dispela 'Jas Pilai' program long lainim nupela skil bilong spot program.

Lav bilong lig i stiaim ol pikinini i go long skul

LAV bilong Lig i stiaim 20 pikinini long Wail Laip setelmen long Pot Mosbi i go bek long skul program ol i bin kamapim olsem literesi na laip skil program long Seifim Pikinini, Nesenel Ragbi Lig, na Wespek.

Laip Litresi Lig em Seifim Pikinini projek we NRL i save go pas na skulim ol yangpela long ol besik bilong literesi na laip skil aninit long ol kos bilong futbol. Ol i save givim ol skil na strongim ol long go bek long skul na statim wok.

Wespek Asutralia i helpim Laip Literesi Lig wantaim Aus\$ 50, 000. Dispela em i wanpela helpim tasol i kam long narapela kantri we Wespek Faundesin i mekim.

Het bilong Ritel bilong Wespek PNG, Cameron Penfold, i tok, "Mipela i bihainim ol risal bilong ol wok plen mipela i bin mekim long lukim ol yanpela pipel i winim wanpela mak we em i gat bikpela kaikai long laip bilong ol aninit long NRL."

"Mipela i gat bikpela amamas long ol pikinini bilong namba wan disisen ol mekim long go bek long skul na dispela em i gutpela sain bilong Laip Litaresi Lig program," Jenerel Menesa bilong NRL PNG, Mark Mom, i tok.

"Dispela em i trupela sain bilong Ragbi Lig i kamap olsem prektikel developmen tul bilong winim ol tru risal we wan wan lain, komyuniti na kantri bai kisim strong long en."



Piksa i soim ol lain long Wail Laip setelmen wantaim Wespek, Sevim Pikinini na ol wok lain long NRL PNG.

...stori i kam long bek pes

"Tim PNG i redi wantaim 7-pela spot long resis long Rio Gems. Ol wan wan spot i trening yet long kamap kwalifai," Waiwai i tok.

"Ol spot Tim PNG i lukluk long en em Etlekiks, Boksen, Judo, Swimming, Taekwondo, Suting na Weitlifting.

"Ol pilaia bai resis long etletiks em Toea Wisil bai resis long 100m na dispela em bai namba tu taim bilong em long resis long Olimpik Gems sapos em i kamap kwalifai.

"Ol narapela etlit i resis strong long kamap kwalifai long go resis long Olimpik Gems long namba wan taim bilong ol em Donna Koniel na Betty Burua i resis long 400mH, Sharon Kwarula i resis long 100mH, na Theo Pinau i resis long 200m.

"Namba 4 taim bilong Mowen Boino na namba tu taim bilong Nelson Stone long resis long Olimpik Gems sapos tupela i kwalifai. Boino i resis long 400mH na Stone i resis long 400m."

"Ol boksa i resis long boksen em Thadius Katua i resis long 60kg, Charlie Keama i resis long 52kg, Andrew Aisaga i resis long 69kg, Jonathan Keaga i resis long 75kg, na Henry Umings i resis long 56kg. Resis long Rio bai kamap namba wan taim bilong ol long resis long Olimpik Gems sapos ol i kwalifai long kwalifaia resis," Kosa bilong boksa bilong Tim PNG i tok.

Tim PNG i redi long Rio Olimpik Gems

Wanpela pilaia tasol husat bai resis long Judo long Rio em Raymond Ovinou long 66kg, na em i namba tu taim bilong em long resis long Olimpik Gems. Em i wanpela pilaia tasol bai pilai long kwalifaia resis.

Ol lain husat i go pas long PNG Swimming i tok, "Ryan Pini bai resis long 100 plai*, 100 fri* na 100 bek*. Rio gem em i namba 4 taim bilong em long resis long Olimpik Gems. Pini bai kwalifai isi tru bikos em i gat sampela gutpela rekot bipo."

"Samuel Seghers bai resis long 100 fri na 50 fri. Dispela bai namba wan taim bilong em long go resis long Olimpik Gems sapos em i kwalifai.

"Ryan Maskelyne bai resis long 100 na 200 breast, na Barbara Vali-Skelton bai resis long 100 breast. Em i namba wan taim bilong tupela long go resis long Olimpik Gems sapos tupela i kamap kwalifai."

Taekwondo i lukluk long 4-pela pilaia long kamap kwalifai em Max Kassman i resis long anda 56kg, Jonathan Paschalis i resis long ova 86kg, Rose Tona i resis long anda 49kg na Samantha Kassman i resis long ova 68kg.

Samantha na Max Kassman i kwalifai long las wiken kwalifai resis long Osenia Taekwondo kwalifaia long Taurama Akwatik Senta long Pot Mosbi.

Long Suting, tripela suta i resis long kwal-



Tupela kosa bilong swiming i toktok long ol swimming resis bai kamap long Rio Gems. Ol kwalifaia resis long swiming em Aust Nesenel resis long Adelaide bai kamap long Epril 7 inap 14, Theodist Nesenels resis long Pot Mosbi bai kamap long Epril 22 inap 24 na Osenia Sempionsip bai kamap long Suva long Julai 21 inap 25. Ol piksa: Andrew Molen

ifai long trep 125 na dabol trep 150 em Angus Donald, Danny Wanma na Darcy Leahy. Mel Donald na Tania Mairi i resis long kamap kwalifai long ea pistol 40 na spot pistol.

"Namba wan lifta ol i lukluk long weitlifting em Morea Baru i resis long 62kg, Dika Toua i resis long 53kg na Thelma Toua i resis long 48kg. Dika i resis 4-pela taim pinis long Olimpik Gems na resis long Rio bai mekim 5-pela taim sapos em i kwalifai," Sir John Dawanicura i tok.

Ol woklain long PNGOC i bin givim taim na kwalifai resis na i tok, "Kwalifai resis bilong ol Etlekiks bai kamap long Me 1 inap Julai 11, na ol bai makim ol etlit aninit long ol resis we IAAF bai tok orait long en.

"AIBA Esia na Osenia Kontinental Olimpik Kwalifai resis long Qian' an, Saina, long Mas 23 inap Epril 3 em i kwalifai resis bilong boksen long go resis long Rio Olimpik Gems.

"Kwalifai resis bilong judo long go resis long Rio em Panam Open resis bai kamap long Mas 12 inap 13 long Buenos Aires, na OJU Sempionsip long Canberra, Australia, bai kamap long Epril 8 inap 9.

"Kwalifaia resis bilong ol meri long resis long suting long Rio bai kamap long Bangkok, ISSF Wol Kap resis, long Mas 1 inap 9. Kwalifai suting resis bilong ol man em i ISSF Wol Kap resis long Cypress bai kamap long Mas

17 inap 25. Tim PNG bai makim namba wan suta long dispela resis long go resis long Rio Olimpik Gems.

"Ol kwalifaia resis long Swiming em Aust Nesenels resis long Adelaide bai kamap long Epril 7 inap 14, Theodist Nesenels resis long Pot Mosbi bai kamap long Epril 22 inap 24 na Osenia Sempionsip bai kamap long Suva long Julai 21 inap 25.

"I gat wanpela kwalifai resis bilong Taekwondo em Osenia Olimpik Kwalifai i bin kamap pinis long Pot Mosbi long Febueri 27 na ol i makim 4-pela pinis we ol bai resis long Rio.

"Weitlifting i lukluk long makim tupela, man na meri lifta, tasol long resis long Rio Olimpik Gems. Dispela tupela lifta bai kwalifai long Osenia Sempionsip bai kampa long Suva long Me 25 inap 28."

PNGOC i tok klia olsem, "Ol pilaia bilong Tim PNG i mas stap seif na lukautim gut bodi bilong ol bikos dispela resis em i bikpela resis na ol i mas stap long gutpela helt na go pilai."

"Dispela em i namba wan taim bilong Brazil long lukautim dispela resis na em i amamas na redi long statim gem.

"Ol pilaia bilong PNG i save resis strong long ol dispela kain bikpela resis na nau ol bai soim namba wan stail na kala bilong ol tu long Rio Gems."



Piksa i soim tupela kosa bilong suting i stap long han sut na wanpela meri suta i stap long han kais. Kosa i tok, tripela suta i resis long kwalifai long trep 125 na dabol trep 150 em Angus Donald, Danny Wanma na Darcy Leahy. Mel Donald na Tania Mairi i resis long kwalifai long ea pistol 40 na spot pistol.



AUTIM MI: Pilaia bilong Yokomo i ran i go long namba wan bes.



Ol poto: Nicky Bernard

SUPA SAB: Supa sab pilaia bilong Hekari FC.



KAM LONG GEP: Pilaia bilong Sait Sena Tigers i pasim bal long wan pilaia bilong em.



ISI YA GRAUN WEL: Presiden bilong Gordons Tas i holim bal strong long pilai bilong ol wantaim Kovera Dogs long Gordons Tas long Sande.



MI KISIM WISIL KAM: Liklik sapota bilong Gordons Tas, em i ran wantaim wisil go insait long pilai graun long givim referi nupela wisil bihain long olupela ino karai gut.



REN NA GRAUN MALUMALU: Pilaia bilong Kovera Dogs i no wari long ren na graun wel, em traim long giamanim pilai bilong Eels.



DIANA
Tuna

Niupela Swit Teist
Nau Igat Moa Oil!

PNG's ORIGINAL TUNA

Manufactured by:
RD TUNA CANNERS LTD.

Tim PNG i redi long Rio Olimpik Gems ...Waiwai bai go pas long Tim PNG



Foapela boksa wantaim wampela meri suta, na Sef de Misin, Emma Waiwai, husat bai go pas long Tim PNG i go long Rio Olimpik Gems long Jun, i sanap wantaim long taim ol i tok klia long Tim PNG bai go resis long Rio.

Philemon Tame i raitim

TIM Papua Niugini i redi pinis long go resis long Rio Olimpik Gems bai kamap long Ogas 5 inap 21, 2016 long Rio, Brazil.

Tim PNG bai lusim Pot Mosbi long Julai 27 we Sef de Misin bilong Tim PNG, Emma Waiwai, bai go pas long dispela Rio Gem.

"Dispela em i namba tri taim bilong mi long kamap Sef de Misin bilong Tim PNG," Misis Waiwai i tok.

"Mi bin kamap namba wan Sef de Misin bilong Tim PNG long yia 2011, long Komonwel Yut Gems long Isle bilong Mann, na namba tu taim em long Glasgo Komonwel Gems long 2014.

"Nau mipela i amamas na laik bihainim ol pilaia bilong mipela bikos ol i kamapim Tim PNG na putim

PNG long ples klia long wol mep. Na mipela i laik sapotim ol strong."

Waiwai i tok moa olsem 206 kantri bai bung na 10, 900 etlit bai resis long Rio Olimpik Gems

Ol bai opim pilai long Ogas 5 inap 21 ol bai pasim na Tim PNG bai lusim Rio long Ogas 22 long kam bek long Pot Mosbi.

Dispela resis em i namba 27 Olimpik Gems bai kamap long Rio. Namba wan Olimpik Gems i bin kamap long yia 1896 long Athens, Greece, na las resis i bin kamap long London long 2012.

PNG i stat resis long Olimpik Gems long yia 1976 long Montreal, 1984 long Los Angeles, 1988 long Seoul, 1992 long Barcelona, 1996 long Atlanta, 2000 long Sydney, 2004 long Athens, 2008 long Beijing, 2012 long London na nau em bai resis long Rio.

...ridim moa long pes 26



Taim yu senisim nepi bilong bebi bilong yu

Senisim long Sensi

Good Products, Better Prices, ikam long

Johnstons Pharmacies Ltd

P.O.Box 1066, Boroko, Papua New Guinea.
Tel +675 325 3185 Fax +675 325 0190 Email sales@johnstons.com.pg